



**pngelectionprinting.com**

**THEODIST LTD**  
THE STATIONERY SUPERMARKET

MP. 16142300

POSTERS    BANNERS    CARDS    A-FRAMES    FLYERS    CAR STICKERS    CORFLUTE SIGNS

**NEC rausim Duma na Pok**

**LUKIM STORI LONG PES 3**

### Aja Potabe i raitim

# Givim bek mani bilong Iektoral Komisin

GAVMAN i brukim lo taim ol i rausim mani bilong Iektoral Komisin na salim i go long narapela hap, Oposisen Lida Don Polye i tok.

Mista Polye i singautim gavman long luksave long namba wan wok ol konstitusenel opis olsem Iektoral Komisin i save mekim, na em i askim gavman long givim bek K20 milien bilong Iektoral Komisin.

Mista Polye i tok dispela K20 milien gavman i bin rausim long akaun bilong Iektoral Komisin na givim i go long fandim tuisen fi fri (TFF) edukesen, em i mani we Iektoral Komisin i bin kisim long Nesanel Baset bilong dispela yia.

Aninit long Nesanel Baset, gavman i bin skelim K400 milien na givim i go long Iektoral Komisin long ranim ileksen.

"Nesanel Baset em i Ekt ov Palamen. Ol Nesanel Baset i save kamap lo taim Palamen i tok orait. Gavman i brukim lo long rausim K20 milien Iektoral Komisin i bin

kisim aninit long Nesanel Baset," Mista Polye i tok.

Mista Polye i tok Nesanel Ileksen em i wanpela namba wan samting long ol demokratik kantri olsem PNG na gavman i mas givim gut sapat na larim ol pipel i gat sans long makim lida bi-

long kantri.

"Ileksen em i namba wan demokratik proses i save givim sans long pipel i makim lida. Gavman i mas spotim dispela proses," Mista Polye i tok.

Seketeri bilong Fainens Dipatmen, Dokta Ken Ngan-

gan, i tok Iektoral Komisin bai kisim bek dispela K20 milien long dispela wik.

Dokta Ngangan i tok dispela toktok we K20 milien bilong Iektoral Komisin i go long frid edukesen i no tru.

"Mipela i givim K20 milien pastaim long las wik. Bai

mipela i givim narapela K20 milien long Iektoral Komisin long dispela wik," Dokta Ngangan i tok.

Long Mande long dispela wik, Iektoral Komisina Patalias Gamato i bin tok Iektoral Komisin i nidim mani long ranim gut Ne-

senel Ileksen long dispela yia na gavman i no mekim gutpela disisen taim ol i rausim K20 milien na givim i go long fandim tuisen fi fri (TFF) edukesen polisi.

"Dispela K20 milien em i mani bilong ranim ileksen. Dipatmen ov Fainens i bin salim K40 milien i go insait long akaun bilong Iektoral Komisin long las wik, tasol gavman i rausim K20 milien long akaun na salim i go long fandim fri edukesen," Mista Gamato i tok.

Em i tok dispela K20 milien we gavman i rausim em i mani bilong mekim ol bikpela wok olsem baim balot bokis, sekyuriti plastik sil, ink, ol voting kompatmen, ol steseneri olsem pen na pepa na ol T'siot bilong ol poling na kaunting opisal.

"Sapos gavman i laik lukim Iektoral Komisin i ranim gut dispela ileksen na kamapim fri, fea na seif ileksen we olgeta manmeri bai vot, ol i mas givim dispela mani i go bek gen long Iektoral Komisin," Mista Gamato i tok.



**WARA WANAMA:** Ol manmeri na pikinini long Wanama ples long Kone insait long Mosbi Saut Iletoret bai amamas nau long nupela wara paip go insait stret long ples bilong ol. Tenkyu long Memba bilong Pot Mosbi saut na Spot Minista Justin Tkatchenko, wantaim Gavana Powes Parkop long wok bung wantaim ol Eda Ranu long kisim wara i go insait long ol liklik ples long Mosbi Saut Iletoret. *Poto: Nicky Bernard*



**Wasa Rice 200g**  
**Em Skel Ya**  
**GROWN FOR THE PEOPLE OF PNG**

# Vanimo ken pulim planti bisnis na invesmen



Vanimo ples balus long Wes Sepik.

**Aja Potabe i raitim**

**BISNIS** na investmen long Wes Sepik i ken kamap bikpela sapos Vanimo ples balus i stap gut, Gavana bilong Wes Sepik, Amkat Mai, i tok.

Gavana Mai i tok kontraksen wok bilong Vanimo ples balus long ekstendim o skruim 500 mita bilong ranwe bilong ples balus i mas kamap hariap bikos dispela ples balus i ken bringim moa sans bilong kamapim bisnis na invesmen.

Mista Mai i bin mekim dispela toktok long Palamen long las wik taim em i laik askim Minista bilong Sivil Aviesen, Davis Steven, long kliaim tok-tok long kontraksen wok bilong ples balus i stop.

Minista Steven i tok Tre-

seri Dipatmen i wok long prinim sek long givim long kontrakta husat i bin go pas long dispela projek.

“Mani mipela i givim long kontrakta i pinis na ol i lusim wok. Tasol nau gavman bai givim ol sampela moa mani na ol bai pinisim dispela projek,” Mista Steven i tok.

Mista Mai i tok Vanimo em i wanpela taun bilong PNG i stap klostu tru long Jayapura long Indonesia, na sans bilong kirapim bisnis, tred na invesmen em i bikpela tru.

“Ol manmeri bilong yumi long Wes Sepik, na Is Sepik i ken kisim bikpela benefit. Gutpela ples balus i ken bringim moa turis i kam insait.

“Ol bisnis manmeri tu bai kam lukim ples na skelim ples long mekim bisnis.

“Mi laikim gavman i mas

kirapim Vanimo ples balus i kamap wanpela bikpela intanesenel ples balus.

Pastaim Gavana bilong Wes Sepik, John Tekwie, i bin laik long kamapim wanpela fri tred zon long Wes Sepik.

As tingting bilong kamapim dispela fri tred zon em long larim ol manmeri PNG na Indonesia i mekim bisnis long Vanimo.

Dispela plen i stap yet tasol gavman i no lukluk long en.

Gavman i bin sainim sampela agrimen long larim PNG i kisim pawa long Jayapura, na balus i ran namel long Jayapura na Vanimo tasol dispela i kamap yet.

Memba bilong Vanimo em i pastaim oposisen lida, Belden Namah.

# Maunten wara bilong Kerema ran gut

MAUNTEN wara bilong Kerema na Kikori i ran gut, Minista bilong Envairomen na Konsevesen, John Pundari, i tok.

Mista Pundari i tok tokim Palamen long las wik olsem olgeta wara bilong Galp Provins i ran gut na no gat wanpela bagarap i kamap.

Mista Pundari i mekim dispela toktok long bekim askim bilong memba bilong Kikori, Mark Maipakai.

Mista Maipakai i bin askim sapos kontraksen wok bilong PNG LNG projek, Papua LNG Projek na arapela ol bikpela risos projek i kamap long Hailans i bagarapim wara.

“Mi laik askim Minista bilong Envairomen na Konsevesen sapos ol wok i kamap long Hailans i bagarapim wara bilong



Minista bilong Envairomen na Konsevesen, John Pundari.

mipela long Galp provins,” Mista Maipakai i tok.

Mista Pundari i tok olgeta maunten wara bilong Kerema na Kikori i ran gut na no gat wanpela bagarap i kamap.

“PNG LNG paipain i no bagarapim wanpela samting. Wara bilong Galp provins i ran gut,” Mista Pundari i tok.

Em i tok Dipatmen bilong Envairomen na Konsevesen i wok long bungim planti bikpela salens long mekim wok na menesim ol envairomen pemit.

“Tasol wok i kamap gut maski mipela gat planti bikpela salens,” Mista Pundari i tok.

## Kantri gat 22 setifait ples balus

**Aja Potabe i raitim**

PNG i gat 22 ples balus we Civil Aviation Safety Authority (CASA) i setifaim na givim tok orait long en, Minista bi-



Minista bilong Sivil Aviesen, Davis Steven.

long Sivil Aviesen, Davis Steven, i tok.

Mista Steven i tok dispela ol 22 ples balus i ken larim ol komosal flait i kamap bikos sefti standet bilong balus na pasindia i orait.

Tasol Taji ples balus long Wes Sepik Provins i no stap long dispela lista, Mista Steven i tok.

Em i tokim Palamen long las wik long Kwesten Taim. Em i bin bekim kwesten bilong Gavana bilong Wes Sepik, Amkat Mai.

Mista Mai i bin askim gavman long kirapim gen Taji ples balus bikos dispela ples balus em i wanpela olupela ples balus we ol Allied Force

ami long Wol Wo 2 i bin yusim long taim bilong pait.

Mista Mai i askim Gavman long luksave long dispela ples balus na kirapim gen bikos ol pipel i nidim sevis long dispela ples balus.

Tasol Mista Steven i tok dispela ples balus i nidim bikpela wok long apim sefti standat bilong em na gavman i no lus tingting long en.

Em i tok gavman i luksave olsem dispela ples balus i ken bringim moa sevis i kam long laip bilong ol manmeri.

Mista Steven i tok gavman i givim K46 milien long stretim gen Vanimo ples balus tasol long Taji, gavman bai luksave long bihain taim.

## Gavman luksave long Noten Haiwe

GAVMAN i givim K10 milien long stretim Noten Haiwe long Oro Provins, Minista bilong Woks na Implementesen, Francis Awesa, i tok.

Mista Awesa i tokim Palamen long las wik olsem gavman i givim dispela mani long mekim ol mentenens wok.

“Aninit long Nesenel Baset bilong dispela yia, gavman i skelim K10 milien long stretim dispela rot,” Mista Awesa i tok.

Em i tok Woks Dipatmen bai skelim sampela moa mani aninit long revaisd rot mentenens program na givim i go long Noten Haiwe.

“Gavman i luksave olsem dispela rot em i wanpela namba wan rot link. Bai mipela i putim Noten Haiwe tu long revaisd rot mentenens program na em bai kisim fanding,” Mista Awesa i tok.

Mista Awesa i tok gavman

i makim K20 milien long wan wan yia long mekim ol mentenens wok long dispela bilong haiwe na dispela bai kamap long tripela moa yia.

Em i bin mekim dispela bihain long memba bilong Ijivitari, David Arore, i bin askim sapos gavman i gat plen long joinim Oro na Sentral Provins.

Mista Arore i tok aninit long Vision 2050, gavman i plen long joinim Oro na Sentral na opim ol ples long givim sans long manmeri i ken mekim bisnis.

“Stat long 2014, gavman i no bin skelim mani na givim i go long apgretim na skruim Noten Haiwe i go moa long joinim Sentral Provins,” Mista Arore i tok.

Oro Provins i gat tupela haiwe – Kokoda Haiwe na Noten Haiwe. Dispela tupela haiwe i stap aninit long nesenel haiwe.

## PNGEC bai bihainim namba na skelim vot pepa

**Aja Potabe i raitim**

OL vot pepa bilong 2017 Nesenel Ileksen bai kam long Indonesia na ol wokman bilong PNG Ilektoral Komisn



Ilektoral Komisina Patalias Gamato.

(PNGEC) bai rausim long Pot Mosbi na pekim gen, Ilektoral Komisina Patalias Gamato i tok.

Mista Gamato i tok ol wokman bilong PNGEC bai

rausim 10 milien vot pepa bilong provinsal na open sia, na bai bihainim namba bilong elijibel vota i stap long wan wan distrik na provins, na skelim ol dispela vot pepa.

Taim ol i skelim pinis, ol bai pekim gen na salim i go long wan wan distrik na provins, em i tok.

Mista Gamato i mekim dispela toktok bihain long memba bilong Chuave, Wera Mori, i bin askim Praim Minista Peter O’Neill long Palamen long las wik sapos PNGEC bai sekim pastaim ol vot pepa i kam long Indonesia na salim i go long wan wan ilektoret na provins.

Praim Minista O’Neill i tok em bai rispekim indipenden wok bilong PNGEC na larim Ilektoral Komisina i mekim wok.

“Mi bai no inap bekim dis-

pela kwesten bikos nogut ol manmeri i tingting karangi long me. Mi laikim Ilektoral Komisn i stap long em yet na mekim stretpepa wok.

“Mi bai askim Ilektoral Komisina long bekim dispela kwesten,” Mista O’Neill i tok.

Mista Gamato i tok; “Ol balot pepa bilong las 8-pela Nesenel Ileksen i bin stap long han bilong PNGEC na long dispela ileksen tu bai stap long han bilong mipela,” em i tok.

Em i tok PNGEC bai rausim, sekim, kauntim na skelim gen ol vot pepa long Pot Mosbi na salim i go long arapela provins na distrik.

“Sekyuriti bilong mekim dispela wok bai tait stret. Olgeta vot pepa bilong 22 provins bai go long wan wan provins tupela wik bipo long vot i stat,” Mista Gamato i tok.

# Enrolmen ejen na data opisa no kisim alawens yet

Aja Potabe i raitim

**SAMPELA enrolmen ejen na data prosesing opisa bilong Ilektoral Komisin i no kisim yet alawens bilong ol, Ilektoral Komisina Patalias Gamato i tok.**

Mista Gamato i tok Ilektoral Komisin (PNGEC) i no baim planti bilong ol data

prosesing opisa na enrolmen opisa long arapela provins na senta ausait long Pot Mosbi.

"PNGEC i no stretim yet alawens bilong ol enrolmen ejen na ol data prosesing opisa husat i bin stretim ol data long wan wan provinsal data senta na mani mak long dispela i go antap long K7 milien," Mista Gamato i tok.

Em i tok alawens bilong ol enrolmen ejen we PNGEC inap long baim long en em i sanap long K7 milien, na mani bilong baim wok bilong ol data prosesing opisa em i K70,000.

"Mipela i no bin baim ol dispela lain long 2016 yet na dispela i wok long mekim wok bilong ilektoral rol

apdet i kamap isi isi o stop long sampela provins," Mista Gamato i tok.

Em i tok Morobe, Is Sepik, Simbu, Isten Hailans, Enga, Wes Sepik, Madang, Sauten Hailans, Bogenvil, Galp na Westen provins i no pinisim gut ilektoral apdet wok.

"Mi laik askim gavman long givim mani long taim

stret long inapim PNGEC long baim ol dispela sevis provaida," em i tok.

Mista Gamato i tok em bai tokaut long nupela det bilong givim aut rit pepa bilong ileksen.

"Long pinis bilong dispela wik, mipela bai tokaut long nupela det bihain long mipela i tok save long Ga-

vana Jeneral.

"Seksen 79(2) bilong Ilek-sen Lo i givim pawa long Ilektoral Komisina i daunim o apim namba bilong de long taim bilong mekim kempen taim rit pepa i kam aut pinis.

"Aninit long lo, kempen i ken kamap namel long 12 o 8 wik," Mista Gamato i tok.

## NEC rausim Duma na Pok

Aja Potabe i raitim

NESENEL Eksekutiv Kaunsil (NEC) i rausim tupela senia kabinet minista bilong gavman na 5-pela bos bilong ol gavman dipatmen long K46.6 milien bilong gavman i lus nating.

Praim Minista Peter O'Neill i tok NEC i mekim disisen long rausim ol dispela lida na tokim ol long step daun na lusim wok bihain long ripot i kamaut olsem ol i no mekim stretpela wok long baim wanpela graun long Manumanu long Sentral Provins.

Minista bilong Publik Entaprais na Stet Investmen, William Duma, na Minista bilong Difens, Dokta Fabian Pok, i lusim kabinet na bai stap tasol olsem memba bilong Palamen taim tupela i wetim wanpela Komisin ov Inkwairi (Col) long kamap.

Arapela ol bos bilong gavman dipatmen na ejensi husat i step daun long larim wok painimaut i kamap em, Seketeri bilong Lens na Pisikel Plening, Luther Sipison, Seketeri bilong Difens, Vali Asi, Siaman bilong Sentral Saplay na Tendas Bod (CSTB), Philip Eludeme, Menesing Dairekta bilong Kumul Consolidated Holdings Limited (KCH) Garry Hersey, na Menesing Dairekta bilong Motor Vehicle Insurance Limited (MVIL), Joe Wemin.

Mista O'Neill i tok dispela Col bai sekim sapos pasin bilong tupela minista i bin bihainim lo stret long mekim



Praim Minista Peter O'Neill

wok o tupela i bin brukim lo taim tupela i bin go pas long muvim Lancron Neval Beis long Pot Mosbi i go long Manumanu ausait long Pot Mosbi.

Memba bilong Kavieng, Ben Micah, i bin tokim Palamen long las wik olsem Minista Duma i bin tokim KCH long salim K46.6 milien bilong KCH i go long akaun bilong wanpela kampani ol i kolim Kurkurb Estates Limited (KEL).

Namel long Desemba 2016 na Januəri 2017, KCH i bin salim K46.6 milien i go insait long benk akaun bilong Kukuramb Estates Limited long Kina Benk long baim 867 hekta graun long Manumanu long wokim nupela beis bilong nevi.

Ol i brukim dispela 867 hekta graun i kamap posen 406, 411, 415, 422, 423 na 154 tasol KCH i no kisim yet len taitel.

Mista Micah i tok Mista Duma i yusim pinis klostu long K15 milien long dispela mani na em i no baim dispela graun long kirapim nu-

pela beis bilong PNGDF Nevi.

Mista O'Neill i tokim benk long stopim akaun bilong KEL na givim olgeta mani i go bek long KCH.

Mista Duma i klaim tok-tok olsem em i no mekim wanpela paul pasin tasol em i bin bihainim desisen bilong gavman na bod bilong KCH.

"I no mi yet i bin mekim dispela disisen. Ol bod memba bilong KCH i mekim disisen.

"KCH, Dipatmen ov Difens na Lens Dipatmen i bin wok-bung long mekim dispela wok. Ol i bihainim lo na ol stretpela proses long mekim samting.

Mista Duma i tok ol miting minit bilong KCH bai soim ples klia olsem ol bod memba bilong KCH i wanbel long baim 867 hekta bilong graun long Manumanu long wokim nupela beis bilong nevi.

"Tripela gavman dipatmen na stet ejensi i bin wok-bung wantaim long mekim dispela. Na ol loya bilong gavman na loya bilong KCH i bin witnessim," em i tok.

## BSP E-Biz ekspu givim gutpela tok save



Deputi Gavana bilong BPNG, Ellison Pidik.

Josiah Ururu Kana i raitim

BENK Saut Pasifik (BSP) i holim wanpela e-bisnis o ilektronik bisnis ekspu long namba wan taim insait long kantri long last wik Trinde 1 Februari long Sir John Guise indo stedium long Pot Mosbi.

Dispela ekspu i bin kamap long skulim ol pablik na midia long ol wanem kain sevis Benk i gat long e-bisnis na long wanem kain senis em i mekim long kantri long em i mekim wok bilong benkim mani i isi long ol pipel na bisnis.

Long wanpela nius komprens long wankain taim yet, Deputi Gavana bilong Benk bilong PNG(BPNG), Ellison Pidik wantaim CEO bilong NICTA Charles Punaha i bin stap wantaim Dennise Konu, Menesa bilong ritel

MSME na planti moa nara-pela lain.

Deputi gavana bilong BPNG, Mista Pidik i toktok long kamapim gutpela hap bilong sapotim e-bisnis. Em i tok klia long e-bisnis olsem wanpela kain we bilong fainensel ektiviti wei i mekim bisnis long internet o onlain.

"BPNG i wok long lukim olsem i gat ol fainensel na dijitel fremwok i stap olsem long mobail fon o ol ilektronik kat na long dispela as mipela i stat wok bung pinis wantaim ol ki fainensel institusen na NICTA long gutpela deliveri bilong sevis bai kamap." Mista Pidik i tok.

Mista Pidik i bin toktok tu long kamapim envairomen we em i singaut long strongpela lejisletiv frem i mas kamap na em i mekim luk-save long Nesnel Peimen

Sistem Ekt 2013.

"Long strongim dispela Ekt mipela bai nau i gat nupela lo long sapotim Peimen Sistem Ekt 2013. Moa long en, mipela nau i gat ol nupela lo long sapotim wok bilong Ekt olsem nupela peimen sistem ovasait wok mipela i gat. Em i lukluk long monitaring wok bilong kliaim ol sek wantaim Kina Otomet Transfe Sistem o KAPS na long kamapim ol polisi ejen, benking na long mekim ol kastoma i gat fesans long kisim wanem samting ol i kisim promis long en na long save long kod ov etik bilong ol ejen." Mista Pidik i tok.

Bihain long dispela Mista Pidik i tokaut long nid bilong infrastraksa developmen bilong benk we ol i mas mekim yet.

## BSP PERSONAL LOAN

Visit your nearest **BSP Branch** today to apply.

✓ 100% unsecured loan

✓ Flexible repayment terms

✓ Loan up to K50,000

✓ Quick approval

The following branches will be open to accept School Fee Deposits **ONLY** on **SATURDAY, 28 JANUARY & 4 FEBRUARY 2017 | FROM 8:45AM - 12:00PM.**

✓ Boroko Branch – NCD

✓ Lae Market Branch – Morobe

✓ Madang Branch – Madang

Back to School is easy with a BSP Personal Loan..

WE ARE BSP

www.bsp.com.pg

# Memba bilong Lae em i strongpela lida



Memba bilong Lagaip-Porgera, Nixon Mangape.



Memba bilong Lae, Loujaya Kouza.



Memba bilong Kikori, Mark Maipakai.

**TUPELA memba ov Palamen i tok memba bilong Lae, Louzaya Kouza, em i strongpela lida husat i save pait long helpim ol grasruts manmeri.**

Memba bilong Lagaip-Porgera, Nixon Mangape na memba bilong Kikori, Mark Maipakai, i tok Mis Kouza em i wanpela strongpela na stretpela lida husat i save les long pasin korapsen.

“Em i wanpela strongpela lida meri. Ol manmeri Lae i mas amamas long em bikos em i stretpela lida, em i no meri bilong toktok nating, em i lida meri bilong

mekim eksen na makim maus bilong ol grasrut manmeri,” Mista Mangape i tok.

Mista Mangape i bin tokim ol manmeri bilong Bumayong long Lae, Morobe Provins long las wik taim ol i bin go lukim wanpela greduesen seremoni long hap.

Oposisen Lida Don Polye, Mista Mangape, Mista Maipakai, na Mis Kouza i bin go lukim dispela greduesen seremoni.

Mista Mangape i tok em i kirap no gut long lukim Mis Kouza i kamapim sampela kain trening long senisim tingting bilong ol

manmeri na givim ol gutpela save long lukautim laip biong ol.

Mis Kouza i bin yusim moa long K590,000 long trening bilong 10,000 manmeri long Lae distrik.

Mis Kouza em i wanpela memba bilong THE Pati bilong Oposisen Lida Don Polye.

Wanpela strongpela polisi bilong THE Pati em long helpim ol yangpela manmeri (o ol yut), ol meri na ol manmeri husat i gat disabiliti.

“Pati polisi bilong mipela i stap long kirapim laip bilong ol manmeri. THE Pati i laik helpim ol yut, ol meri na ol manmeri husat

i gat sampela kain sik o lek han i bagarap.

“THE Pati i stap long helpim dispela kain ol manmeri.

“Taim mipela i stretim sindaun na laip bilong ol manmeri, dispela bai bringim gutpela sindaun long komyuniti na developmen bai kamap long kantri.

“Mipela bai senisim PNG. Gavman i kirapim planti rot na bris tasol dispela i no senisim pasin na laip bilong ol pipel,” Mista Mangape i tok.

Memba bilong Kikori, Mark Maipakai, i mekim wankain toktok

long dispela taim.

Mista Maipakai i tok ol pipel bilong Lae i no mekim rong disisen long votim Mis Kouza i kam insait long Palamen long makim ol.

“Em i gat strong long pait long nem bilong yupela. Em i trupela lida bilong ol liklik, grasruts manmeri.

“Em wanpela kain lida husat i save putim yupela long lewa bilong em. Em i save krai long yupela,” Mista Maipakai i tok.

Mista Maipakai i tok Mis Kouza i no save pret long askim ol kwesten long praim minista o minista long plua bilong Nesenel Palamen.

## Ol Kristen manmeri mas votim gutpela lida



Oposisen Lida Don Polye i givim setifiket long Misina Paul long Bumayong long Lae, Morobe Provins.

OPOSISEN Lida Don Polye i singautim ol Kristen manmeri long kantri long beten strong na votim gutpela lida.

Mista Polye i tok PNG i nidim ol gutpela lida husat bai prèt long Papa God na husat bai bihainim laik bilong ol manmeri na putim intres bilong kantri i go pas.

Em i tok long dispela ileksen long 2017, ol Kristen i mas beten long Papa God bai givim gutpela tingting long ol manmeri i ken makim gutpela na stretpela lida husat bai makim maus bilong pipel long Palalmen.

Mista Polye i mekim dispela toktok long Bumayong long Lae, Morobe Provins taim em i bin go lukim wanpela greduesen seremoni wantaim Memba bilong Lae, Loujaya Kouza, long las wik. Memba bilong Lagaip-Porgera, Nixon Mangape na

memba bilong Kikori, Mark Maipakai, i bin raun wantaim ol long dispela raun.

“Level bilong pasin korapsen i wok long go antap moa yet. Ol lida i wok long brukim lo yet. I no gat wanpela gutpela pasin bilong gavanens i stap.

“Pasin bilong demokrasi na sistem bilong gavman i wok long bruk isi isi,” Mista Polye i tok.

Em i tok nau em i taim bilong ol Kristen manmeri i sanap na askim Papa God long givim ol gutpela lida husat bai prèt long God na mekim stretpela wok.

“Yumi ol Kristen i no ken slip. Yumi mas sanap na mekim eksen. Yumi askim man antap long senisim kantri. Yumi mas makim gut ol gutpela lida long ileksen taim,” Mista Polye i tok. Mista Polye i tok ol Kristen

manmeri i mas beten strong na putim long prea point sampela ol no gut samting we ol manmeri na gavman i wok long mekim long bagarapim kantri.

“Ol yangpela manmeri i wok long mekim planti pasin raskol, planti yangpela manmeri i go insait long pamuk pasin, planti yangpela manmeri i dring bia. Dispela kain pasin bai bagarapim kantri bilong yumi,” Mista Polye i tok. Mista Polye i autim dispela strongpela toktok long Bumayong we em i bin toktok long moa long 580 manmeri husat i bin greduet wantaim setifiket.

Ol i bin kisim trening long senisim tingting na kamapim gutpela pasin long komyuniti.

Mista Polye i givim K50,000 long Lutheran Sios long Bumayong long pinisim nupela sios.

## Madang taun LOA siaman laikim nupela dreines sistem

**James G. Kila i raitim**

SENTRAL bisnis distrik (CBD) o komesal eria bilong bisnis namel long Madang taun i pulap tru long wara na tais bikos bikipela ren i wok long pundaun na no gat rot long ol wara i go aut na wara i pulap long olgeta kona bilong taun.

Ol wara i kamapim tu bikipela bagarap long

Modilon rot i go insait long taun na ol liklik han-rot na strit insait long taun eria.

Siaman bilong Madang Taun Lenonas Asosesin, Talad Lucas i mekim bikipela askim i go long Madang Taun Eben Lokal Level Gavman (MULLG) long

kamapim sampela plen o proposal long askim Nesenel Gavman o ovasis dona ejensi long helpim long wokim nupela dreines sistem long Madang taun.

Em I tok ol simen gata na simen baret nau i stap em bilong bipo yet long kolonial taim na bilong 1960s na 1970s na ol i olupela pinis.

Lucas i tok olsem nau long dispela taim em sisen bilong hevi ren na moa hevi bai kamap sapos MULLG na ol lida bilong Madang i no hariap long wokim sampela samting long kontrolim ran bilong wara i go aut.

Narapela man I stap longpela taim long Madang, Peter Morgan i tokaut olsem

ol outlet o ples wara i save bihainim baret na go aut long solwara em planti i pas bikos ol bisnis lain i kirapim ol haus na stua na wokim simen na blokim ol eria we wara i save go aut long en.

Morgan i askim olsem nupela dreines projek i mas kamap long stretim ol baret na ol gata arere long rot long Madang taun.

Em i sapotim toktok bilong Mista Lucas olsem Madang i mas wokim nupela dreines sistem bilong en long kontrolim ren wara bikos nau yet no gat gutpela outlet bilong wara na ol bung bung long ol eria long taun na kamapim hevi na ples tais long planti hap.

## Watpo mi lusim gavman: Kouza

PASIN bilong Praim Minista Peter O’Neill long strongim sait na tok no gat long givim wan ten bilong nesenel reveniu bilong PNG i go long Papa God i mekim memba bilong Lae, Loujaya Kouza, i lusim gavman.

Mis Kouza i bin mekim dispela toktok long Bumayong long Lae, Morobe Provins long las wik.

Em i tok Mista O’Neill i bin tok gavman bai givim 2 pesen bilong mani i kam long PNG LNG tasol dispela i

no kamap yet.

Mis Kouza i tok Mista O’Neill inap long bringim dispela toktok long plua bilong Palamen long kisim tok orait long Palamen tasol dispela i no kamap yet.

“Dispela toktok i stap long Buk Baibel na mi bringim dispela toktok i go long Palamen bikos yumi putim bikipela Buk Baibel long Palamen pinis.

“PNG em i Kristen kantri na mi gat rait long tokim gavman long dispela samting. Tasol gavman i les long

bihainim toktok bilong mi.

“Taim em i tok olsem mi tok tenkyu na mi sinduan. Mi no nid lo stap long gavman we i no luk save long God.

“Mi tok tenkyu long bekim bilong em na mi sindaun long sia bilong mi long Palamen.

“Mi no inap long stap long gavman we i no save luksave long Papa God. Long dispela as mi lusim gavman, toksave long Gavana bilong Morobe Kelly Naru, na joinim Oposisen,” em i tok.



# PIH Saveman Nias

"I kam long Pacific International Hospital Port Moresby"

Ph: 311 3000 and 799 88000 Website: www.pihpng.com

## Prevention of mother to child transmission of HIV/AIDS



Dr Jannatul Ferdous  
General Physician – Pacific International Hospital

from a very young age without proper knowledge of safe sex practices, the lack of availability of ART, inaccessibility of condoms, and inadequate antenatal service only work to further exacerbate the problem and put the young generation at the greatest risk.

About 3000 children live with HIV in Papua New Guinea today.



Majority of these children are infected by the virus from their mothers during pregnancy, labour or delivery and through breastfeeding. However, only one-third of the affected young population are able to afford and receive the treatment they need. Many of children are only identified as HIV-positive when they begin to get sick or fail to thrive in society. Others, especially from poor and remote families, face extreme challenges as majority service centres are located in urban areas.



According to a recent World Health Organization PMTCT guideline, pregnant women with HIV, lactating mothers and HIV-exposed infants are recommended to follow anti-retroviral therapy. It is highly advised that pregnant and breast feeding mothers living with HIV should continue with ART throughout their lives, regardless of the CD4 count or WHO clinical stage. However, the patient's CD4 count should be monitored closely through frequent blood testing. In addition, ART should be continued after delivery and during the entire course of the lactation period. It is also important to note here that the simplified treatment of taking one pill once a day by the mother is highly effective in preventing mother-to-child transmission. However, even with the availability of possible ART and preventative methods, it is advisable to do C-section for women who are positive with HIV, due to the high risk of transmission through shared blood and body fluids in the birth canal. Similarly, it is always recommended that HIV-positive mothers refrain from breastfeeding following childbirth, and opt for alterna-

tive infant feeding methods.

All infants born to HIV-positive mothers should receive a course of antiretroviral treatment immediately after birth. The treatment should be linked to the mother's course of antiretroviral drugs and the infant's feeding method.

- Breastfeeding - the infant should receive once-daily nevirapine from birth for six weeks.
- Replacement feeding - the infant should receive once-daily nevirapine (or twice-daily zidovudine) from birth for four to six weeks.

At four to six weeks old, all infants who are born to HIV-positive mothers should be given an early infant diagnosis. A second HIV test should be done at 18 months and/or when breastfeeding ends to provide a final diagnosis for the infant.

The formation of National AIDS Council, introduction of AIDS Control Committees in various provinces, education and promotion of safe sex strategies, such as condom use, and participation of churches and increases in antiretroviral medication coverage have all helped decrease transmission.

However, unsafe sexual practices have put adults, sex workers, their clients and the partners of clients at a greater risk of acquiring HIV. This situation is exacerbated when the exponential rise of HIV-positive women goes on to transmit the virus on to their children.

"The impact of AIDS on children is both complex and multifac-



eted. Many suffer intense psychosocial and economic distress, and are likely to leave school to work to support their families. If they have lost their parents to AIDS, most end up living with the stigma and discrimination attached to the disease. This means they have less access to basic services, and that they are at higher risk of abuse and exploitation – and ultimately at higher risk of becoming HIV-positive themselves," as warned by Ms Brandt of UNAIDS.

Voicing in the same tone with UNAIDS, we should all work to reduce mother to child transmission of HIV as Start Free, Stay Free, AIDS Free – a framework that calls for a worldwide "super fast-track targets" to end AIDS among children, adolescents and young women by 2020.

If you have any further queries or seek more information, you may get in touch with the Pacific International Hospital at Ph No. 7998 8000 or email them at info@pihpng.com. Alternatively, you may even visit their new website at www.pihpng.com and post your queries.



As of 2015, approximately 36.6 million people have been infected by HIV worldwide of which 1.8 million are children below the age of 15. So, do we ever pause to think 'Is our baby safe from this deadly virus?'

HIV can be transmitted from mother to child, otherwise known as "mother-to-child transmission", during pregnancy, labour, delivery or breastfeeding, and accounts for over 90% of new HIV infections among children.

An infected mother can pass on the virus to her child. Therefore, it is crucial that healthcare professionals advise and offer effective methods to prevent such transmission and lower the prevalence of mothers and children living with HIV.

Effective prevention of mother to child transmission (PMTCT) may include a cascade of interventions: antenatal services, HIV testing during pregnancy, use of antiretroviral treatment (ART) by pregnant woman living with HIV, safe childbirth practices, appropriate infant feeding, infant HIV testing and other post-natal healthcare services.

Without adequate intervention, transmission rates can soar as high as 45%. But the risk can easily be brought under 5% with effective ART and other PMTCT interventions.

It is very important that great emphasis be given to 'safe sex' education, social and economic empowerment of women, gender equity, use and availability of contraceptives, and a well-developed and sustainable program to prevent new infections.

Recent studies suggest that countries like Thailand, Belarus, Armenia, and Republic of Moldova have been successful in preventing the transmission of this deadly virus from mothers to their children. PNG is well advised to emulate this example.

Since the first identifiable case in 1987, Papua New Guinea has become one of the worst affected Pacific Islands with HIV. It accounts for 70 percent of the subregion's HIV cases and is the fourth country (after Thailand, Cambodia, and Burma) to be classified as having a generalized HIV epidemic.

As a highly polygamous society that engages in sexual activity



**WELL WOMAN CLINIC**

- \* Complete Health Check - Includes Pelvic Ultrasound
- \* PAP Smear Test
- \* Mammogram
- \* Gynecologist Consultation

A special package at a special price for your Special one

**BOOK NOW**

**CALL US AT 71 55 88 66**



# CIC laik wokbung wantaim polis

Paul Zuvani i raitim

**KOPI Industri Koporesen (CIC) laik wokbung wantaim polis long karimaut gut wok bilong em, Steven Tumae, Jenerel Menesa bilong koparesen i tok.**

Dispela em long taim Tumae i makim koparesen long sainim wanpela memorandum ov andastending (MoU) wantaim polis komisina Gari Baki long Polis Hetkwata long Konedobu, Mosbi long dispela wik.

Em i tok planti taim ol CIC i laik mekim wok tasol bikos long raskel pasin dispela i holim taim na givim hevi long ol i ken mekim gut wok.

Em i tok sampela taim ol man i save stilim kopi long gaden o fam bilong ol fama na go salim long mekim mani.

Sampela taim ol raskel i stilim kopi long ol kopi baia na bihain i go salim na mekim mani gen.

“Moa long dispela ol raskel i save holim mipela na kisim mani taim mipela i laik go baim kopi o helpim ol fama long lukautim kopi,” Tumae i tok.

“Dispela MoU i bilong lukim polis i givim tok orait long trenim sampela opisa bilong mipela olsem risev polis we ol bai was long mipela taim mipela i mekim wok.

“Planti taim raskel pasin i pasim mipela long mipela i go het long mekim gut wok bilong mipela.”

Tumae i no tokaut long hamas mani

na wanem taim stret CIC bai go het long dispela MoU na yusim mani long trenim ol opisa tasol i tok ol bai karim aut dispela wok long olgeta 15-pela kopi provins long kantri.

Em i tok inap long wanpela yia kopi i save mekim K100 milien i go long K500 milien na dispela i olsem 800 i go long wan (1) milien beg kopi.

“Las yia kopi i kisim i kam insait K650 milien na dispela i gutpela mak.

“Olgeta taim gavman i tok long maining na wel projek tasol dispela i winim mani sampela maining na wel kampani i save kisim i kam insait,” Tumae i tok.

Em i tok CIC Stratejik Plen i tok long

koporesen i mas kamapim 6 milien kopi beg long wanpela yia.

Tasol em i tok dispela i no inap kamap taim raskel pasin i bikpela.

Long bekim polis komisina Gari Baki i tok em i amamas na i redi long salim ol polis opisa bilong i trenim sampela CIC opisa.

“Mi save long kain sindaun bilong lo na oda na wok bilong kopi long Hailans na olsem em i orait long mipela i trenim ol opisa bilong yupela,” em i tok.

“Wantaim dispela disisen em i taim bilong (jenereal) ileksen na olsem nogut sampela CIC opisa bai mekim wok olsem risev polis long dispela taim tu.”



Lep han: Gari Baki, polis komisina i holim MoU wantaim Steven Tumae long lukim sampela CIC opisa i kisim trening long kamap risev polis. Poto: Nicky Bernard

## Muthuvel givim petisen bilong Lakiemata kalabus man

GAVANA bilong Wes Nu Briten Sasindran Muthuvel i makim maus bilong ol kalabus manmeri long Lakiemata haus kalabus long Kimbe na i givim wanpela petisen i go long gavman long las wik Trinde.

Mista Muthuvel i givim dispela petisen long Praitim Minista Peter O'Neill, husat i makim maus bilong gavman na i kisim.

Mista Muthuvel i tok ol haus kalabus lain bilong Lakiemata i laikim gavman long hariapim wok bilong parol bod bilong PNG.

Parol bod i save skelim pasin bilong ol kalabus lain na i save katim daun sampela yia bilong ol sapos pasin bilong ol kalabus lain i senis na ol i mekim gutpela pasin.

Mista Muthuvel i tok ol kalabus lain long Lakiemata i makim maus bilong arapela poroman bilong ol i stap long narapela haus kalabus long kantri na i raitim na givim dispela petisen bikos parol bod i no mekim gut wok bilong ol.



Gavana bilong Wes Nu Briten, Sasindran Muthuvel.

“I no gat wanpela pemenen bod memba bilong parol bod. Aninit long humen raits lo, ol dispela lain i laikim gavman long makim pemenen bod memba bilong parol bod na strongim wok bilong ol long taim stret,” Mista Muthuvel i tok.

Em i tok taim parol bod i no mekim wok, namba bilong ol kalabus lain i wok long pulap na ol i brukim banis na i kam aut.

Long dispela wik tasol, moa long 60 kalabus man i brukim banis na i kam aut.

People  
connecting  
Business People

**PNG Air**

CENTRAL RESERVATIONS

Phone: + 675 7222 2151 | Fax: + 675 325 4867  
TOLL FREE NUMBER 16111 | Email: reservations@pngair.com.pg

# Ol gavana mas helpim skul long provins

WOK bilong lukautim edukesen sevis long kantri i no wok bilong Nesenel Gavman tasol em i wok bilong ol gavana na wan wan memba bilong palamen, Edukesen Minista Nick Kuman, i tok.

Mista Kuman i salensim ol gavana bilong wan wan provins long luksave long namba wan samting edukesen i save mekim long kantri na wan wan komyuniti.

“Wok bilong helpim ol pikinini long skul gut em i no wok bilong mi tasol. Em i no wok bilong nesenel gavman tasol.

“Em i wok bilong yumi olgeta. Mi laikim oil wan wan gavana bilong wan wan provins long go pas long wan wan provins.

“Gavman i kamapim dispela tuisen fi fri (TFF) edukesen polisi long helpim ol papamama na helpim ol skul pikinini bilong yumi long skul, kisim save na kamap gutpela manmeri long bihain taim.

“Nesenel Gavman i mekim wok bilong em. Edukesen Dipatmen i mekim wok bilong em.

“Tasol planti taim ol memba na gavana i no save mekim wok bilong ol gut.

“Mi laik salensim ol gavana na memba long luksave olsem bihain taim bilong wan wan provins na distrik em i stap long han bilong ol skul pikinini.



Edukesen Minista Nick Kuman.

“Yumi olgeta i mas wok bung wantaim na mekim wok long larim fri edukesen polisi bilong gavman i ran gut,” Mista Kuman i tok.

Em i bin mekim dispela toktok long Palamen long las wik taim em i laik tok klia olsem gavman i baim pinis skul fi bilong olgeta pikinini long kantri.

“Mi les long harim olsem skul i rausim ol skul pikinini. Mi kisim ripot olsem sampela skul long Nesenel Kepitel Distrik (NCD), Morobe na Madang i rausim ol pikinini i go aut long klasrum.

“Mi les long harim dispela kain toktok. Mi laik singaut strong long ol bod na het tisa bilong skul long bihainim dispela toktok.

“Larim ol skul pikinini i skul. Mi gat pawa long rausim bod na menesmen bilong skul. Tising Sevis Ekt i givim dispela pawa long Edukesen Minista i ken rausim bod na menesmen bilong skul sapos skul i sakim tok bilong minista o gav-

man,” Mista Kuman i tok.

Em i tok gavman i save givim K10 milien long wan wan yia olsem Distrik Sevis Impruvmen Program (DSIP) fan.

“Insait long dispela K10 milien, K2milien em i mani bilong edukesen. Ol memba i mas yusim dispela K2 milien long givim edukesen sevis long ol skul i stap insait long wan wan distrik bilong ol,” Mista Kuman i tok.

Em i tok Edukesen Dipatmen i wok long menesim skul fi subsidi bilong moa long 2.2 milien skul sumatin long elementari, praimer, hai, na sekenderi skul long kantri.

“Mi laik askim ol gavana na memba long helpim mi givim fri edukesen sevis i go long ol pikinini bilong yumi long kantri,” Mista Kuman i tok.

Em i tok gavman i baim pinis K75 milien bilong dispela tem. Dispela mani bai helpim ol skul long baim skul fi bilong ol sumatin nabaim arapela ol steseneri olsem buk na pensil.

DPM,” Sir Puka i tok.

Sir Puka i tok ol wan wan DDA i mas bihainim Wanpenamanda distrik na skulim ol wok manmeri bilong DDA long mekim wok.

“As tingting long kamapim DDA em long bringim gavman sevis i kam klostu long haus dua bilong ol pipel bilong yumi,” Sir Puka i tok.

Em i tok Mista Pato i wok long bihainim DDA Ekt na mekim ol samting we dispela lo i laikim ol siaman bilong DDA long mekim.

Aninit long DDA Ekta, open memba bilong distrik em i siaman bilong DDA na distrik edministreta em i CEO bilong DDA.

Sir Puka i tok Mista Pato i statim pinis ol wok we siaman bilong DDA inap long mekim.

“Mi amamas tru. Wapenamanda DDA i go het gut na mi bilip olsem arapela ol DDA bai bihainim wanem samting Wapenamanda i mekim,” em i tok.

# PNG inap long sasim refuji husat bin ranawe

PAPUA NIUGINI gavman i tok, refuji husat bin ranawe i go long Fiji bai inap long kamap long kot.

Loghman Sawari i lusim Pot Mosbi long wanpela giman paspot, long tupela wik i go pinis. Tasol ol polis long Fiji i bin kisim em long Fraide taim em i wokabout wantaim Loya bilong em. Ol i laik go lukim wanpela imai-gresen opisa long aplai long kisim asailum.

Dispela man em gat 21 krismas na em bilong Iran. Em i bin stap long Manus ailan aninit long ol Australia taim em bin 17 krismas.

Atoni Jeneral bilong Fiji, Aiyaz-Khaiyum i tok Mista Sawari i feil long dispela ranawe plen bilong em olsem na ol i salim em i kam bek long PNG.

Em i tok tu olsem mista Sawari i stap olsem wanpela refuji aninit long PNG olsem na Fiji i nogat rait long salim em go bek gen long kantri bilong em.

Wanpela man lukautim em i tok Mista Sawari i bin stap insait long Pot Mosbi



Loghman Sawari long Fiji. Photo: Behrouz Boochani

ples balus moa long 5-pela awa long taim em i bin kambek long Fraide. Bihain long ol opisa bilong imai-gresen i kisim em aut long intenesenel teminal.

Minista bilong Imaigresen na Foren Afas, Rimbink Pato i tokim Fairfax nius olsem “Mekim giaman pepa bilong

kisim paspot bilong go long narapela kantri em kriminal ofens insait long PNG. Husat man o meri i brukim lo bai sanap long bikpela kot.”

Kurdish Jenelis na Manus ailan detainee Behrouz Boochani i tok, em i kisim tok olsem Mista Sawari i stap nau wantaim polis bilong PNG.

## NICTA tokaut long hevi bilong cyber crime lo

Josiah Ururu Kana i raitim

SIF Eksekutiv Opisa (CEO) bilong NICTA, Charles Punaha i bin tokim ol media long wanpela pres konpres las wik long taim bilong BSP i holim e-bisnis ekspo, long ol wok bilong cyber crime ekt o lo.

Mista Punaha i wanbel olsem i gat internet i kam insait long kantri pinis tasol bagarap i kamap em i no bikpela tumas olsem long ol narapela kantri long rijon na long wol.

“Mipela i luksave olsem planti mobail fon sevis i kam insait na i go bikpela olsem 50 pesen moa tasol wei bilong mipela i go insait long lukim ol internet em daun tumas yet long 10 pesen tasol na dispela em i no gutpela tumas,” em i tok.

“Dispela cybercrime lo nau i stap wanpela wantaim bilong Australia na ol narapela kantri long kamapim gutpela wok bilong Ekt na long ol wanem kain mekim save em i mas go long ol lain husat i brukim dispela lo,” Mista Punaha i tok.

Em i tok olsem taim ol i tok orait long cybercrime Ekt 2016 em bai givim pawa long ol na helpim ol lain bilong lukautim ol lo long ol inap long holim pas na sasim

ol lain husat i save brukim dispela lo. Em bai helpim ol long bringim ol ilektronik evidens long kot rum na tu long skulim ol pablik na mekim ol long luksave long ol hevi i save kamap long cybercrime long PNG.

“Mipela nau i wok long sekyuriti bilong cyber wantaim wanpela projek we bai mipela i putim ol komputa bilong ripotim na monitarim ol internet trafik we i save i go i kam insait long PNG wantaim ausait wol na bai mipela i pait long daunim wantaim dispela nupela cyber lo.” Mista Punaha i tok.

Em i tok tu olsem wanpela namba wan hap bilong banisim ol pipel long cyber crime em long sim kat lo 2016 we Het ov Stet i mekim long bosim na lukautim ol sim kat, long edministresen na menesmen bilong ol infomesen databes.

Mista Punaha i bin soim sampela piksa bilong ol kain mekim save we ol bai givim aninit long dispela lo, long husat man o meri i brukim dispela lo bilong cyber crime ekt. Ol mekim save i stap long mak olsem, sistem intafierens bai inap long 10-pela yia long kalabus o K10,000 kot fi long wanpela

man o meri na K50,000 long ol bisnis o kampani. Stilim ol data o rekot long komputa em bai kisim 30 yia kalabus taim na K100,000 kot fi bilong wanpela man o meri na mak bilong K500,000 i go long K1,000,000 bilong ol koporet bodi o bisnis.

Brukim lo na stap bai gat kot fi k10, 000 o kalabus long 7-pela yia, na K50, 000 fi bilong ol kampani o bisnis. Ol narapela komputa lo em long ilektronik frod o giaman na stilim mani wantaim komputa na dispela em kot fi bilong wanpela man bai stap long K25, 000 i go long k100,000 o kalabus inap long 15 i go 25 yia kalabus long wan wan man na K500, 000 i go K1 000, 000 long koporet o kampani. Giaman olsem narapela man long komputa em kot fi bilong em i ken go antap long K15, 000 i go K100, 000 o 15 i go 25 yia kalabus na kot fi inap long mak bilong K500,000 i go long K1 000,000 long ol bisnis o koporet bodi.

“Cyber crime Ekt em i stap pinis wantaim NICTA na i wok nau wantaim wok bung bilong gavman na ol intenesenel bodi we ol i wok long kamapim ol fremwok bilong en nau,” Mista Punaha i tok.

# Wapenamanda soim rot long DDA

Aja Potabe i raitim

WAPENAMANDA distrik long Enga Provins i kamap namba wan distrik long kantri long bihainim lo na polisi bilong Distrik Developmen Atoriti (DDA) na bringim sevis long pipel.

Minista bilong Pabli Sevis, Sir Dokta Puka Temu, i tok em i amamas long lukim Minista bilong Foren Afes na memba bilong Wanpenamanda, Ribink Pato, i go pas long mekim dispela namba wan wok insait long distrik.

Sir Puka i bin mekim dispela toktok long Palamen long las wik taim em i laik bekim kwesten bilong memba bilong Kikori, Mark Maipakai.

Mista Maipakai i bin askim sapos ol wan wan DDA i gat pawa long kamapim nupela pablik straksa bihainim nid bilong sevis diliveri long wan wan distrik bilong ol.

“Distrik bilong mi em i

narapela kain tru, olgeta ples wara i raunim. Wok fos bilong Kikori distri bai no inap wankain olsem Kandep o Kavieng.

“Long dispela as, mi laik kamapim nupela pablik sevis straksa insait long distrik bilong mi na mi askim minister long tok klia,” Mista Maipakai i tok.

Tasol Sir Puka i tok ol wan wan DDA i no gat pawa long kamapim nupela pablik sevis straksa long laik bilong ol yet.

Em i tok ol i mas bihainim pablik sevis straksa we Dipatmen ov Pesenol Menesmen (DPM) i kamapim.

“Sapos yu laik mekim sampela senis, DDA bilong yu i mas raitim pas i kam long Minista bilong Pablik Sevis na Seketeri bilong DPM long kisim tok orait long kamapim dispela nupela straksa.

“Long laik bilong yu yet, yu no gat pawa long mekim dispela wok, em i wok long

# Olgeta mama Asosiesen long Mosbi Saut kisim helpim

Nicky Bernard i raitim

**OLGETA** mama grup long Mosbi Saut ilektoret i kisim mani bilong ol long helpim asosiesen bilong ol.

Dispela helpim i kam long memba bilong ol Justin Tkatchenko bihain long em i bin promis long ol long sampela taim go pinis.

Insait long Mosbi Saut ilektoret klostu long 100 pesen ol mama grup o asosiesen i kisim helpim long memba bilong ol long mekim liklik wok long helpim sindaun bilong ol.

Long las wiken tripela mama grup long Sikis Mail kisim helpim bihain long memba bilong ol na Minista bilong Sports na APEC Justin

Tkatchenko i promis long givim longpela taim i go pinis.

Namba wan grup em ol mama long Okapa Asosiesen, insait long dispela asosiesen i gat tripela grup bilong ol mama na memba bilong ol i givim K60,000.

Bai K20,000 go long wan wan grup. Narapela Asosiesen em long Ragamuga 2 Asosiesen. Dispela Asosiesen i gat tupela grup bilong ol mama na dispela ol mama grup em ol bin stap long Paga Hill na kontrak lain i bin muvim ol go long Sikis Mail na lusim ol long hap.

Memba bilong ol i givim K40,000 na K20,000 bilong wan wan mama grup. Las mama grup long Sikis Mail

em ol mama bilong Goilala. Dispela Asosiesen bilong ol em Dark Street Asosiesen. Dispela asosiesen i kisim K40,000 na em bilong tupela mama grup insait long dispela asosiesen.

Memba na Minista bilong Sports na APEC i stretim ol promis bilong em taim em kisim ol fanding bilong em. Na klostu long 100 pesen promis em mekim pinis long ilektoret bilong em long Mosbi Saut wantaim helpim bilong Gavana Powes Parkop.

Memba bilong Mosbi Saut i tok "Bipo long ileksen bai kamap bai mi pinisim olgeta liklik wok mi promis long mekim insait ilektoret bilong mi."



Ol manmeri na pikinini bilong Okapa i stap long Sikis Mail i amamas long memba bilong ol na givim em wanpela pik.



Tripela mama grup presiden bilong Okapa wantaim Memba bilong Justin Tkatchenko na K60,000 sek mani bilong ol.



Tupela presiden bilong Ragamuga 2 kisim sek mani bilong ol long han bilong Memba bilong ol.



Ol mama grup bilong Dark Stret long Sikis Mail i amamas wantaim sek mani bilong ol.



Dark Street mama grup wantaim sek mani bilong ol wantaim memba bilong ol na Sports Minista Justin Tkatchenko. Ol poto: Nicky Bernard





## Tingting Gut na Makim Lida

ANAU long dispela taim ol pipel bilong Amerika i no amamas tru long nupela lida bilong ol, Donald Trump.

Presiden Barak Obama i pinisim wok lida na nau Donald Trump i kisim ples bihainim ileksen bilong ol.

Tasol yumi bai askim olsem wanem na ol pipel i no amamas? Amerika em i ples we yu ting demokrasi i wok gut tru – we gavman em i bilong ol pipel na ol pipel yet i ranim. Tasol sapos ol pipel i no laikim Donald Trump bilong wanem tru na ol i votim em? Sapos ol i no votim em hau tru na em i win?

Dispela ileksen bilong Amerika i gat planti skul long yumi long Papua Niugini taim yumi wok long redim long go insait long ileksen bilong yumi tu.

Planti tok promis i wok long kam nau. Planti dispela ol promis i yusim dispela hap tok 'bai'. Long planti kona bilong PNG ol wok developmen i no bin kamap bihainim ol promis bilong las ileksen. Nau yumi harim ol dispela promis i kamap gen, 'bai mi mekim dispela sapos yupela i votim mi'.

Sampela man na meri i go long ol haus lotu na mekim ol promis long ol sios. Ol wok bilong lotu nau i muv bikos sampela mani tu i kapsait. Ol mama grup, yut grup na spots grup i amamas tru long dispela taim bikos planti mani i pundaun nau. Tasol dispela ol mani i stap we na 4-pela yia rot i bagarap na haus sik i no gat marasin na skul i no gat tisa?

Olgeta kainkain promis bai i kam tasol salens tru em bai i kam taim yu wan wan vota i sanap long bokis bilong makim man o meri yu laikim em long makim yu long palamen. Dispela em i pawa yu gat. Tasol yu bai fri tru tru long makim lida yu laikim long em? Nogut yu bihainim tasol hauslain na bihain yu krai bikos yu karim kopi bek na kalapim planti maunten.

Donald Trump em i no man bilong lotu o mausman bilong ol fektori wokmanmeri o kain olsem. Em i bisnisman na em i save long pasin bilong win. Em i tasim bel bilong ol liklik manmeri taim em i go kempein.

Long PNG tu ol liklik manmeri bai i kamap impoten tru long ai bilong kendidet insait long tripela mun. Em bai i sindaun long mumu ples wantaim yu, o go long lotu wantaim yu o harim wari bilong ol mama. Em bai i sindaun long hauskraik bilong yu na yu ting dispela em i lida tru tru. Tripela mun em bai i tuhat long mekim gut long ol pipel bilong em.

Bihain long dispela taim ol i win na go insait long palamen ol i lus tingting long yu.

Tasol salens nau em husat tru bai i stap praim minista. Yu vota. Yu bai lukluk long man o meri kendidet o yu bai lukluk long ol promis bilong pati?

Yu vota yu laikim gavman we i gat belsori long yu na ol liklik pipel bilong Papua Niugini o yu laik bihainim tasol dispela man o meri i save laik ppen wantaim ol bisnis manmeri bilong ol arapela kantri. Yu vota yu laikim Papua Niugini i mas sanap independen tru tru o yu laikim ol bisnismanmeri bilong arapela kantri i ranim kantri bilong yu?

Dispela yia, 2017 em i bikpela yia bilong Papua Niugini. Long July bai yumi gat nupela gavman. Bai yumi krai olsem ol pipel bilong Amerika bikos ol i asua na votim man we ol i no laikim?

Tingting gut. Dispela kantri em i bilong yu vota na yu yet i ken stretim ol krangki yu lukim.

Yu laikim lida em i gat daunpasin na em i man na meri husat bai i makim gut ol pipel bilong em? Em i taim yu tingting na mekim gutpela disisen taim yu go long vot.

# Numbos: Skul ples bilong wok bung wantaim

Sr Mary McCarthy i raitim

**SKUL i ples bilong papamama i bung wantaim ol tisa long wok wantaim long skulim gut pikinini, Vincent Numbos bilong Katolik Edukesen Seke-teriat i tokim bung bilong ol Katolik eduketa long Mosbi Asdaioses long Don Bosco Teknikol Sekendari Skul bipo long stat bilong 2017 skul yia.**

Em i tok wok bilong tisa i bilong bihainim wanpela tru- pela tisa em Jisas Kraiss,

Numbos i tokim ol tisa olsem bipo long ol i stat na go het long mekim wok, ol i mas larim Bikpela i go pas long ol.

Em i tok long bung ol i tok

yesa gen long mekim wok stret ol i tok promis long en.

Em i tok olsem skul i ples bilong bung. Em i tok skul i ples we papamama i bung wantaim ol tisa we tupela i ken bung long skulim pikinini long kamap gut.

Em i tok long skul pikinini i lain long wanem samting i tru, gutpela na i stret. Long skul pikinini i kisim save long tingting, i strongim bilip long lewa bilong em na i kisim save long mekim samting wantaim han bilong em.

Ol tisa i bin stap long wan grup bilong ol na i toktok tu long kamap bilong gutpela poroman pasin.

Sampela i painim aut olsem em i hatpela samting long bungim pasin tumbuna wantaim tok bilong Bikpela, long bihainim kalsa o bihainim tok i stap long Baibel.

Sampela i tok wanpela samting we i save mekim poroman pasin i hat em pasin bilong braid prais, o baim meri.

Wanpela tisa i tok em i tru painim gutpela poroman i ken hat tasol wanpela samting em olsem olgeta i mas bihainim tok i stap long Baibel long stap gut.

"Mipela ol tisa i kisim save long wei mipela i stap na wok na ol traime i kamap long em. Mipela i kisim ol gutpela skul," Numbos i tok.

"Long dispela mipela i mas serim dispela save wantaim ol pikinini husat i stap aninit long mipela

"Mipela i mas soim pasin bilong ikwaliti na yuniti."

Numbos i go moa wantaim toktok bilong Pop Francis we i tok long bel isi stap namel long olgeta man, meri na pikinini we ol olsem mak bilong Bikpela i ken givim luksave long wanpela na narapela na mekim gut long em.

Ol tisa i holim wanpela lotu we rit bilong Filipins 4:12 i tok long wanpela i mas tok tenkyu long ol blesing em i gat long en, maski em i bikpela o liklik.

## Bas bai helpim skul program

Charlpetson Koi i raitim

MOA sumatin insait long Nesenel Kapital Distrik bai i gat sans long joinim Nature Park program ol i save holim olgeta yia long karikelum bilong ol sumatin.

Dispela program "Come Explore With Us" i bin kamap wanpela gutpela program autsait long klasrum. Namba bilong ol sumatin i save go long pak i kamap bikpela olgeta yia.

Tasol, transpot i save kamapim wanpela hevi we ol pablik skul i save hat long go long dispela program.

Long Fraide las wik, Ela Motors i givim bas long helpim Nature Park wantaim dispela program.

Nature Park i stap arere long Yunivesiti bilong Papua Niugini ol i save lukautim kain kain enimal na ol bus plent bilong Papua Niugini.

Olsem hap bilong ol skul karikulum, Nature Park i save helpim long skulim ol sumatin long Nesenel Kapital ol bikpela samting bilong ne- tural envairomen.



Ela Motors i bilasim bas long kainkain ol enimal na putim sain bilong Nature Park. Ol i bin givim dispela bas long las wik Fraide. Foto: Charlpetson Koi

Tasol, planti bilong ol sumatin i save go long dispela program em ol sumatin long ol praivet skul bikos planti ol pablik skul i no gat skul bas.

Ela Motors i lukim nid bilong ol na ol i givim 25 sita bas olsem longtaim sapot bilong ol long kisim planti moa sumatin long dispela program.

Namba bilong ol sumatin i go bikpela taim dispela program i stat long 2013.

Jenerel Menesa bilong Nature Park, Michelle McGeorge i tok bikpela tenkyu long Ela Motors i helpim planti ol

sumatin.

"Long 2013, bipo mipela i bin gat skul bas olsem 4, na 115 sumatin tasol i bin joinim dispela program. Planti ol sumatin i bilong ol praivet skul wantaim transpot bilong ol yet."

"Tasol, las yia mipela i yusim bas bilong mipela yet na mipela i skulim olsem 16,546 sumatin na mipela i givim ol trutru sains skul we bai i kamapim save bilong neseserel envairomen bilong PNG. Long dispela yia, mipela i tingting long skulim 18,000 sumatin long dispela pro-

gram," Ms McGeorge i tok.

Sif Eksekutiv Opisa bilong Ela Motors i givim ki bilong kar long hetman bilong dispela edukesen program.

"Mipela i amamas long sapotim Nature Park wantaim dispela bas long wanem em bai helpim ol sumatin long save gut long kain kain ol plent na enimal bilong PNG," Mista Abe i tok.

Dispela bas bai i sans long ol sumatin long ol pablik skul tu long stap insait long dispela program na save long envairomen bilong PNG.

## Kisim skul bilong save long yusim sosol midia

Fr Ambrose Pereira i raitim

INAP olsem 28 tisa bilong Marianville Sekendari Skul, Bomana i kamap long wanpela in-sevis long Pot Mosbi long save wanem samting em sosol mida long stat bilong dispela mun.

Bikpela as tingting bilong skul i bilong ol tisa i ken save na skulim gut ol sumatin long wei bilong yusim gut ol rot bilong salim na kisim ol gutpela toksave long sosol midia.

Sosol midia em ol toksave wanpela i save kisim o salim tok long ol samting olsem telepon, mobail teks (sms), imel, Facebook, Twitter na Linkin.

Dispela skul em Pater Ambrose Pereira, SDB, i givim.

Pastaim long ol tisa i kisim skul askim i go long ol tisa sapos ol i save wanem samting i sosol midia.

Sampela bekim em i kisim em sosol midia "i samting olgeta i pas long em," "i wanpela ilektrik samting we wanpela i ken pas na kamapim onlain komyuniti," "i samting we wanpela i ken kisim toksave na kamap wantaim ol samting."

Dispela Fr Ambrose i tok em ol gutpela bekim.

Em i tok ol dispela samting olsem telepon, mobail na imel em ol samting i kamap

pinis na bai stap we laip bilong mipela bai pas long em.

Em i tok dispela ol samting i senisim sindaun bilong wol pinis.

Na em i wok bilong mipela long save long gutpela rot bilong yusim dispela ol samting. "Bikos sampela ol tisa i pas na save pinis long yusim dispela ol samting, i gutpela long mipela i mas lukim sapos ol inap long skulim gut ol sumatin," Fr Ambrose i tok.

"Ol sumatin husat i save pinis tu long yusim dispela ol samting, em tingting bilong ol tu i senis.

"Askim tu em long lukim ol tisa husat i no save gut em ol

i mas save olsem i no inap tingting na wari sapos sumatin bilong ol i salim na kisim toksave taim ol i yusim dispela ol samting?"

"Wanem polisi em skul i gat long dairektim ol sumatin long yusim dispela ol midia samting?"

Fr Ambrose i tokim ol tisa olsem ol i mas strongim tingting bilong sumatin bilong ol long gutpela wei bilong salim na kisim toksave.

Em i tok i mas gutpela luksave na rispek namel long ol tisa ol sumatin.

Em i amamas long dispela bung na i hop ol tisa bai skulim ol pikinini.

# Yunaitet Sios Helt Sekretari tokaut long developmen

**Shirley Gar i raitim UPNG Jenelism sumatin**

**HELT Seketeri bilong Yunaitet sios insait long PNG Roman Pemb i amamas tru long tokaut long ol wok kamap insait long wan wan helt senta aninit long Yunaitet sios insait long PNG, insait long yia 2016-2017.**

Namba wan wok developmen em kirap bilong ol etpos insait long ol rurel ples. Dispela i lukim kain hap o ples olsem Kandep Distrik insait

long Enga, Pogera, Magarima Distrik insait long Tari, Chuave Distrik insait long Chimu Provins. Long sentrel Provins, yumi lukim kain hap olsem Kairuku Distrik, Hiri Distrik na Goilala Distrik.

Long Westen Provins, yumi lukim tasol Kunim senta.

Namba tu wok developmen em long givim trening na skul bilong HIV/AIDS i go long wan wan nes man na nes meri insait long wan wan Yunaitet helt senta insait long bik bus bilong PNG. Dispela wok tren-

ing ol i kolim long 'Provider initiated counselling and Testing' - (PICT). "I bin gat 132 nes man na meri bilong Niu Briten rijon, Bougenvil rijon, Niu Ailan rijon na Papua ailan rijon i bin kisim dispela skul." Pemb i tok

Namba tri wok developmen em long wan wan helt senta husat i yusim tingting long rait i go long Sios Stet Patnasip Program (Church State Partnership Program) aninit long gavman bilong Australia long kisim helpim long stre-

tim olupela bilding, em i tok. "Wanpela gutplela eksampel em long Malalia helt senta insait long wes Nu Briten Provins we i lukim bikpela wok developmen insait long olgeta wod, staf opis, haus kuk bilong ol sik manmeri, klinik bilong bikpela manmeri na ol liklik pikinini. Helt Seketeri bilong Yunaitet Sios Helt sevis insait long West Nu Briten wantaim ol bod bilong em i bin amamas tru long lukim opening las yia 2016, Pemb i tok.

## Haus sik sot long marasin

Wanpela lotu hausik bilong Yunaitet sios long Wes Nu Briten i kisim bikpela taim long painim marasin na ol instramen bilong ol sik man meri.

Rose Gar husat em i helt sekreteri bilong Yunaitet sios insait long Wes Nu Briten (WNP) i tok, ol i pilim bikpela hevi long pela taim. Em i tok tu olsem planti haus sik insait long Wes Nu Briten i save kisim taim long marasin.

"Mipela save oda ol saplai long rabaul sto haus tasol nau mipela save wet longpela taim, misis Gar i tok.

Em i tokaut olsem taim marasin i bin sot, planti hausik insait long Wes Nu

Briten i save baim suplai bilong ol long Kimbe siti famasi olsem nau stok bilong siti famasi tu daun olsem na mipela olgeta bai wet gen.

"Planti long mipela ol haus sik i les long wet bikos taim mipela i wet, sik manmeri kisim taim. Olsem na mi kam long Mosbi long kisim ol marasin na liklik instramen bilong Malalia hausik tasol na go bek", Misis Gar i tok.

Em i tok tu olsem nau Gavman bilong yumi stap long mani hevi, haus sik save kisim gren mani bilong em leit. Dispela i bagarapim liklik opresen bilong hausik, olsem marasin na ausait wok.

## Soso givim kensa masin long Goroka Provinsal haus sik



Gavana bilong Isten Hailans Julie Soso (namba 3 long rait) i givim ki bilong nupela 10-sita kar i go long deputi bod siaman bilong Isten Hailans Provinsal Helt Atoriti Jackson Apo. Long lephan i go long rait em Ekting CEO Dokta Max Manape, Profesa Glen Mola na tupela trena bilong Thailand. Foto: Loutova Siapea

**Loutova Siapea i raitim**

MOA long seven handet 700 meri long PNG i save dai long wan wan yia long sevikel (cervical) kensa. Dispela sik i na kamap long bilum bilong ol pikinini.

Dispela namba em long ol kes we helt atoriti i luksave na kisim ripot long en. Tasol planti ol ripot bilong kensa em i no save i go kamap long opis bilong helt atoriti. Sapos dispela ol ripot i go kamap long opis bilong helt atoriti, i luk olsem namba bilong ol meri husat i save dai long sevikel kensa bai i ken dabol na i go antap tru.

Planti ol meri i wok long lusim laip long sik kensa long wanem i no gat wanpela masin long kantri i ken helpim na oraitim ol. Li no sevikel kensa tasol, ol arapela sik kensa tu.

Taim planti ol sapota bilong ol meri na helt sekta tu long Isten Hailans na PNG tu i tok-

tok na kempen strong long baim ol kensa terapi (therapy) masin long helpim ol meri, tasol i no gat wanpela gutpela bekim i save kamap.

Isten Hailans em i wanpela long ol provins we planti ol mama na meri i wok long kisim sik kensa na i wok long lusim laip bilong ol tu.

Dispela sik i no kamap nau tasol, nogat. Em i bin kamap na i stap longpela taim pinis long provins we em i wok long daunim na kilim i dai planti ol mama na meri.

Taim ol hevi na ol ripot, lida meri long provins Julie Soso husat i bin winim ileksen long 2012 na kamap gavana i luksave long dispela ol ripot na sik kensa.

Em i bin wari na pilim bikpela pen tru na mekim komitmen na tok promis long givim sampela mani long Provinsal Sevis Impruvmen Program (PSIP) fans i go long Isten Hailans Provinsal Helt Atoriti (EHPHA) long

painim rot long daunim sik kensa long provins.

Long 2013 wanpela yia bihain long ileksen, gavana Soso i onaim tok promis bilong em we em i givim mani mak inap long sikis handet tausen kina (K600,000) i go long EHPHA.

Long dispela mani EHPHAi baim 10-pela kensa masin, wanpela ten sita kar na em i kamapim na ranim tu ol skills trening program bilong sik kensa na ol arapela helt program long provins.

Long Fraide tupela wik i go pinis EHPHA i kamapim seremoni we Gavana Soso i bin kamap olsem opisal ges ov hona na opim Well Mother's Clinic bilong Goroka Provinsal haus sik. Long wankain taim tu em i givim 10-pela kensa masin na wanpela nupela ten sita kar em opis bilong em i bin baim long ol mani we i kam yet long PSIP.

"Olsem wanpela meri na

## Oposisen pait long helpim Manumanu papagraun

OPOSISEN i sapotim ol papagraun bilong Manumanu long Sentral Provins i kisim bek graun bilong ol.

Oposisen Lida Don Polye i tok ol papagraun bilong Manumanu i kam askim ol, na olgeta memba bilong Oposisen i wanbel long helpim ol.

Mista Polye i tok Oposisen i raitim wanpela pas i go long Polis Frod Skwat na i askim ol polis man i mekim wok painimaut long sekim olsem wanem saspended Minista bilong Pablik Entaprais na Stet Invesmen, William Duma, na Difens Minista Dokta Fabian Pok, i yusim K46.6 milien gavman mani long baim graun long Manu-

manu long muvim Lancron Neval Beis i go long hap.

Mista Polye i tok ol memba bilong Oposisen i putim ripot pinis long polis frod skwat na ol i putim komplein pinis long Ombudsman Komisin.

Papagraun na siaman bilong Gabadi ples, John Ovia, i bin go lukim Oposisen long kisim helpim bilong ol long kisim bek dispela 867 hekta graun bilong ol.

Dispela 867 hekta graun i karamapim posen 406, 411, 415, 422, 423 na 154.

Mista Ovia i singautim ol ausait manmeri long lusim dispela graun bilong ol na givim i go bek gen long ol papagraun.

"Pait bilong mipela em long helpim dispela tupela minista long bihainim lo na mekim samting stret," Mista Polye i tok.

Long Mande long dispela wik, Praim Minista Peter O'Neill i tok Nesenel Eksekutiv Kaunsil (NEC) i mekim disisen long rausim dispela tupela senia kabinet minista.

Mista O'Neill i tok kabinet i mekim disisen tu long rausim bos bilong 5-pela gavman dipatmen na ejensi.

NEC bai makim ol tems ov refrens long kamapim wanpela Komisin ov Inkwairi long sekim sapos Mista Duman na Pok i bin bihainim lo long mekim dispela wok.

## UNFPA i gat nupela bos long kantri

mama, mi pilim pen long kisim ol ripot na luksave olsem planti ol meri long provins i wok long kisim sevikel kensa na i wok long dai. Na olsem lidameri na gavana bilong provins, mi bai wok hat long painim ol mani na putim i go long wok bilong pait bilong daunim sik kensa na sevim laip bilong ol mama na meri bilong mipela long provins", Gavana Soso i tok.

Em i tok promis olsem taim Isten Hailans Provinsal Gavman i skelim mani long 2017 baset, em bai brukim sampela mani i go long helpim wok bilong daunim sik kensa long Goroka Provinsal Haus sik na ol arapela helt senta long etpela distrik long provins tu.

Gavana Soso i tok amamas long menesmen bilong EHPHA long yusim gut dispela mani long baim ol samting bilong helpim ol meri long provins.

YUNAITET Nesens Populesen Fan (UNFPA) i gat nupela kantri representativ, em Koffi Kouame, husat i bin givim ol kridensels o ol pepa bilong wok long dipatmen bilong foren afes long las wik Fraide 3 Februari.

Mista Kouame i bin givim ol pepa bilong em i go long Seketeri bilong Foren Afes, William Dihm na em i tok bikpela tingting bilong ol ejensi bilong Yunaitet Nesen olsem UNFPA em, "No gat meri i mas i dai long taim ol i wok long bringim laip".

Em i tokim Foren Afes Seketeri olsem olgeta UN ejensi i save wok olsem wanpela lain tasol wantaim wanpela tingting. UNFPA em i gat wok bilong kamapim wanpela kain ples we olgeta mama bel i gat ples, olgeta bebi bon i stap seif na olgeta yangpela pipel i gat spes long inapim olgeta driman bilong ol.

Mista Kouame i tok UNFPA i wok bung wantaim Papua Niugini gavman long 22 yia pinis, stat long yia 1994.

"Wantaim wok bung bilong mipela, mipela i bin inap long kamapim moa save long populesen na long yusim populesen long ol plen bilong developmen. Mipela bin inap long helpim ol meri long ol yet i ken tok hamas pikinini ol i laikim na long wanem taim ol i laikim, wantaim ol famili plening program, mipela i bin inap long daunim namba bilong ol bel mama i save dai long taim bilong karim bebi, mipela i bin inap long mekim ol komyuniti i luksave long stopim jenda bes vailens, na long givim sans long ol yangpela pipel long givim han long developmen wok na long ol i ken kisim save long ol lwei bilong kamapim pikinini na ol sevis bilong en," em i tok.

# Save na Mekim

Sapta 2  
...moa yet long hap 1 (SAKSAK)  
Kaikai bilong givim strong

## SAKSAK Tok bilong wokim saksak

Diwai saksak i save stap olsem 12-pela krismas na bai plaua i kamap. Taim plaua i kamap, dispela em i gutpela taim bilong wokim saksak.

Ol man i save katim diwai saksak na rausim skin. Ol i memeim waitpela namel na bihain wasim long wara. Wara i kisim kaikai bilong saksak i go long wanpela hap bilong em yet. Bihain ol man i karamapim na kukim sot-pela taim long paia. Bihain ol i karamapim gen long lip na karim i go long ples.

Dispela kain saksak i gat wara bilong en i stap yet. Sapos yu larim i stap longpela taim liklik, bai em i kamap blakpela, na smel bilong en i strongpela. Tasol em i no sting. Man i ken kukim yet na kaikai.

### Tok bilong skrapim as saksak

Ol tumbuna i bin memeim saksak long wanpela kain ston bilong paitim saksak. Nau tu ol manmeri i save wokim olsem tasol. Orait, long ples Simbini, Madang Provins, ol manmeri i painimautim narapela rot bilong skrapim saksak. Mista J. Bailey i bin lukim na i salim ripot i kam. Ol i wokim skrap saksak long plang wantaim nil.



Bikpela skrap bilong memeim namel bilong diwia saksak. Em i winim ston bilong paitim saksak, na em i save memeim saksak i go liklik tru. Bai kaikai bilong en i kamap planti.

# PNG Forum bilong ol meri i kamap long Goroka

PNG Meri Foram 2017, bilong Hailans Rijon i stat long Mande dispela wik long Goroka, Isten Hailans provins.

Dispela foram i kamap wantaim helpim bilong U.S Embesi long Pot Mosbi wantaim Dipatmen bilong Komyuniti Dvelopmen na PNG Traibel Faundesen na em i namba 4 foram na em i namba wan taim long em i kamap ausait long Pot Mosbi.

Embesi bilong Yunaitet Stets i patna wantaim Papua Niugini, Solomon Ailan, na Vanuatu

long holim Foram bilong ol meri long Goroka stat long Tunde Februeri 7 i go long Trinde Februeri 8, 2017.

Bikpela toktok bilong dispela tupela de foram em long 'Strengthening our Voices Together' (Strongim Toktok Bilong Yumi Wantaim).

Long namba wan de em kibung i lukluk long oleksen wantaim bikpela tok olsem: Pawa bilong ol Vois na de namba tu em long ikonmik empawamen: Wok Wantaim long kamapim Ikonmik Empawamen.

"Tenkyu long sapot bilong PNG Gaveman, moa meri na



Embeseda bilong U.S Catherine Ebert-Gray wantaim ol wokmeri bilong U.S Embesi i kamap long Goroka long Mande dispela wik. Tupela de foram i bin kamap long Tunde 7 na Trinde 8 long Yunivesiti ov Goroka. Poto: U.S Embesi

ol gel nau i stap long skul na yunivesiti, winim ol taim bipo. Na ol meri i gat luk-save long ol ples bilong wok long bikpela benk bilong PNG na nau i gat moa meri brens menesa winim namba bilong ol man," U.S Embeseda long PNG, Catherine Ebert-Gray i tok.

Moa long 300 meri na man i bin rejista long stap

insait long foram na bikpela tenkyu i go long ol sponsa em, ExxonMobil, Oil Search Foundation, Australia Hai Komisen na Yunivesiti ov Goroka.

Ol bikman na meri husat bai kamap long foram em Gavana bilong Isten Hailans, Julie Soso, meri bilong Praitim Minista, Lynda Babao-O'Neill, Seketeri bilong Di-

patmen bilong Komyuniti Dvelopmen, Anna Solomon, U.S Embeseda long Papua Niugini, Solomon Ailan na Vanuatu Catherine Ebert-Gray, Australia Embeseda bilong ol Meri na ol Gel, Dokta Sharman Stone, Dame Carol Kidu, na Menesing Dairekta bilong ExxonMobil, Andrew Barry.

## Florikalsa i go bikpela long Goroka

Loutova Siapea i raitim

FLORIKALSA o plaua bisnis em i wok long go het strong tru long planti ol bikpela senta long PNG.

Na planti ol lokal meri i wok long mekim florikalsa i kamap olsem bisnis bilong ol. Na long mama Manawe Irarue (long poto) bilong Riona hauslain long Henganofi distrik, Isten Hailans plaua em i no bin tingting long kamapim bisnis long en.

Long planim, holim na stretim gut ol plaua long bek yad bilong em long Dok Strit long Goroka em i wanpela samting em i save laikim tumas long mekim. Tasol bihain long sampela yia, em i painim aut long ol arapela meri olsem em i ken mekim bisnis na mani long ol plaua.

Olsem na em i bin traim long wokim mani long ol plaua bilong em. Na taim em i traim, em i kisim bek gutpela kaikai bilong dispela ol plaua bilong em. Nau yet em i wokim gaden plaua we em i groim kain kain kala



Manawe Irarue em i mama bilong plaua long Goroka taun. Poto: Loutova Siapea

plaua, na bipo long ol plaua bilong em bai bagarap, em i save pikim, putim gut tru insait long ol plaua pot o ves (vas) na em i save karim i go long ol bikpela opis, ges haus na ol sios tu long

Goroka. Na long wanpela de long wan wan wik mama Manawe i save kamap na senisim ol plawa we em i save rausim ol olupela plaua na senisim wantaim ol nu-

pela plaua. Dispela em i kamap olsem bisnis bilong em na insait long wan wan mun em i save kisim sampela liklik mani long strongim wok bilong em i go het.

# Bilip mekim manmeri laik sanapim K5m sios

Paul Zuvani i raitim

**GUTPELA bilip i mekim kongregesen i wok long sanapim ken Ela Yunaitet Sios haus lotu long Mosbi Taun long mani mak bilong K5 milien.**

Propeti Menesa bilong Yunaitet Sios na wanpela kongregesen memba bilong Ela Yunaitet haus lotu Arthur Moi i tok ol pinisim top plua tasol namba tu plua na graun plua i no pinis yet.

Em i no inap long tokaut long hamas mani ol i yusim pinis na hamas mani i stap yet long ol i mas bungim bipo long ol ken pinisim gut olgeta hap.

Em i tok nau yet lokal sios i no kisim wanpela sapot o sponsa long sanapim dispela haus.

Ol i save yusim tasol mani ol i kisim long Sande koleksen.

Em i tok dispela liklik haus lotu we i stap moa long 100 yia i bagarap na ol i kisim i go long Hanuabada.

Long kisim ples, ol memba i wok long sanapim tu (2) stori haus wantaim graun plua we top plua bai gat

opis, namba tu em haus lotu na graun plua ol bai putim kago bilong sios.

Em i tok wan wan Sande ol memba i save mekim olsem K7000 na i amamas long kain ofa.

“Pastaim ol manmeri i save tingting planti o pret long givim hamas mani ol i mas givim tasol nau ol i givim tasol,” Moi i tok.

“Mipela i bin stat wantaim samting olsem K100 long wanpela Sande bihain K1000 tasol nau mipela inap kisim olsem K6000 i go long K7000 long wan wan Sande.

“Dispela em i mak bilong bilip bilong ol manmeri na i strongim ol long wok bilong sios tu.”

Moi i tok planti ol kongregesen memba em ol wok manmeri we ol i bilong olgeta hap bilong kantri na sampela bilong narapela kantri.

Em i tok bikos ol i wok long mekim nupela sios, nano gat ples bilong lotu lokal minista wantaim ol memba nau i save lotu long Kaugere Yunaitet Sios, Mosbi Saut.

Long givim sapot long sios

em i tok bihainim ol skul toktok i stap long Baibel long Wok bilong ol Aposel na pas bilong ol aposel, em i tok em i wok bilong ol lokal memba long givim sapot long sios.

“Long Yunaitet Sios em wok bilong wan wan kongregesen long sapotim pasto na wok bilong em long dispela hap,” Moi i tok.

“Ol i no inap long wetim

mama Yunaitet Sios long givim sapot long minista o pasto.

“Kain pasin i givim wok tu long wanpela memba bilong sios long soim bilip bilong ol.”

Dispela hap long taun we Ela Yunaitet haus lotu i sanap i namba wan ples we Yunaitet Sios i sanapim haus lotu bilong em long leit 1800s na bihain i go long ol arapela hap bilong kantri.



**Arthur Moi i sanap long level wan bilong haus we wok bai mas kamap yet na we bai kamap stap olsem haus lotu.**

Poto: Paul Zuvani.

## Ol sios wok bung wantaim pablik

Loutova Siapea i raitim

**NAMBA** bilong ol kain kain hevi na pasin bikhet olsem kisim drag nogut na mariwana, kisim ol strongpela dring, kros, birua na pait namel long ol wan pisin na ol arapela pasin we i save bagarapim gutpela sindaun long ol hauslain na viles komyuniti long Watabung na Lowa na Apa Asaro long Daulo distrik bai i ken i go daun na stop tu. I bin gat luksave bilong pasin bilong wok bung namel long ol sios na lonsing bilong pastas fratanel (pastors fraternal)

long dispela distrik.

Gavana bilong Isten Hailans Julie Soso husat i bin kamap na stap insait long opim Pasto fratanel long Daulo distrik i tok olsem lida meri bilong provins em i gat bikpela amamas long lukim olsem emi namba wan taim long lukim pasto fratanel i kirap long Daulo distrik, wanpela long 8-pela distrik long provins.

Em i tok em i luksave olsem i gat kain kain hevi na trabel i save kamap long ol haus lain na viles olsem na long daunim dispela kain ol pasin nogut, gavman bilong em i bin kirapim provinsal

pasto fratanel we ol sios bai i ken bung na mekim wok bilong traim na daunim na stopim tu dispela ol hevi na trabel pasin.

“Mi amamas olsem pastos fratanel long provins bai i ken kamapim distrik pasto fratanel we wok bung namel long ol pablik na ol sios bai i ken kamap. Na bikpela as tingting bilong kamapim kain grup em long stretim gut ol man na meri husat bai i ken senisim pasin bilong ol, kamapim gutpela sindaun na divelopim tu wan wan viles na hauslain bilong ol”, Mis Soso i tok.

Em i mekim strongpela

toktok i go long ol sios long i no ken kamapim ol kros na jeles toktok i go i kam long bagarapim wanpela narapela. Em i tok ol i mas kamapim belisi na wanbel pasin long wok bung na stretim gut ol haus lain na viles komyuniti.

Mis Soso i tok em i stat bilong kirapim ol pasto fratanel long ol distrik, namba wan taim long Daulo. Na ol arapela distrik olsem Obura/Wonenara, Kainantu, Henganofi, Okapa, Lufa na Unggai/Bena distrik bai bihainim long kisim tu ol pasto fratanel bilong ol.

## SOCAY givim gutpela skul

Paul Zuvani i raitim

**PLANTI** ol skul i save stap bilong givim skul long ol manmeri long kisim save long strongim bodi na tingting tasol.

Ol i save tingting tumas long spirit.

Tasol wanpela skul we i save givim skul long strongim bodi, tingting na spirit em HELP Our Children and Youth (SOCAY).

SOCAY em skul ol Sacred Heart Brothers, Katolik Sios i go pas long em long helpim ol yangpela husat planti i stap long strit long kamap gut long laip.

Skul i save skulim ol mangi wantaim ol laip skil kos olsem

wok didiman, plaming na kapentri tasol i lainim ol mangi long olgeta pasin bilong man em - Integral Humen Development na lainim ol mangi tu long save long God na bihainim tok bilong em.

Wanpela mangi husat i kam aut long dispela skul em Otis Elal.

Elal i bilong ples Karam long Galp provins.

Em i gro ap long strit, i no save long rit na rait tasol nau i gat save bihain long em i go long SOCAY.

Dispela yia em bai go long La Salle Teknikol Koles, Hohola long mekim Gret 8 bihain long em i mekim gut long eksam bilong em long Gret 7 long SOCAY las yia.

“Mi no kamap gut long laip. Nogat wanpela man i lukautim mi gut na i putim mi long skul,” Elal i tok.

“Tasol taim mi bungim hevi, ol Bruda (Sacred Heart Brothers) wantaim het tisa Ludwina Bogeia na ol tisa i bin gutpela na putim mi long skul.

“Hia mi no lain long save long rit na rait tasol save tu long tok bilong God.

“Mi amamas long skul na amamas long go moa long skul bilong mi.”

Deputi het tisa Linsen Dope i amamas tu long Elal na i tok Elal i wanpela piksa bilong as tingting bilong kamap bilong skul.

Em i tok SOCAY i kamap bihainim as tingting bilong

leit Pater William (Bill) Leibert, SVD, husat i kamapim ol Bois Taun Senta (haus kalabus bilong ol yangpela) long Wewak, Is Sepik; Erap long Markham long Morobe na Hohola long Mosbi.

Dope i tok stat long 2010 skul i gat ol klas long Gret 7 i go inap long Gret 10.

Em i tok ol sumatin nau i save sindaun long fainel nesenel Gret 8 na Gret 10 eksaminesen wantaim ol arapela skul long kantri.

Em i tok taim ol sumatin i mekim gut long Gret 7 ol i ken aplai na go long ol nomol skul long edukesen sistem.

Skul fi em K800 long wanpela yia.



## Yut, Meri na Famili

Pastor Barbara Lunge

## God i bekim ol pre wantaim guria na klaut i pairap

“NA dispela smok i gat gutpela smel wantaim ol prea bilong ol manmeri bilong God, ol i lusim han bilong dispela ensel i sanap i stap long pes bilong God, na ol i go antap.

Orait ensel i kisim paia long alta na em i pulimapim long dispela ples bilong smok i gat gutpela smel, na em i tromoi paia i go daun long graun. Em i tromoi pinis, orait ol klaut i pairap na bikpela nois i kamap, na lait bilong klaut i sut i go nabaut, na graun i guria.” Kamapim Tok Hait 8:4-5

God i harim ol pre we yumi bringim i go long em, long taim bilong em yet. I gat taim na sisen bilong olgeta samting we i save kamap aninit long heven. Planti bilong yu i bin wok long pre long makim ol pipel bilong graun na kraik long God bai mekim stretpela pasin o jastis, transperensi na trupela pasin long givimaut ol samting na ol sevis i kam long ol lida bilong yumi.

God i bekim ol askim bilong ol pre pinis long de 29 Januari 2017 Sande nait taim em i brukim olgeta bikpela spirit na pawa na ol atoriti na lain husat i save bosim ol skai na kontrolim kantri bilong yumi, ol provins, distrik na ol ples na ol wan wan sitisen na ol i save stap long dispela kantri. Ol provinsal spirit we i save tanim tingting na pasin bilong ol pipel tu em ol i kisim bagarap pinis na em i ronim ol i go pinis.

I gat bikpela senis em i laik kamap nau insait long kantri long ol politik, iekonomik, sosel, lotu na kalsa sistem. Bikpela senis bai kamap long ai bilong yumi.

“Tasol ensel i save lukautim kantri Persia i bin pasim mi inap long 21 de. Em i mekim olsem, na wanpela namba wan ensel, nem bilong em Maikel, em i kam bilong helpim mi, long wanem, em i lukim mi wanpela tasol i stap wantaim ol king bilong Persia, na i no gat man bilong helpim mi”. Daniel 10:13

Prins Spirit husat i bosim kantri bilong yumi Papua Niugini nau em i Ak ensel Maikel. Kantri bilong yumi em i kavanen nesen we pastaim praim minista, Gren Sif Sir Michael Somare i sainim tok promis long lotu long God bilong Israel. Nau yumi singautim King bilong Glori, Bikpela Jisas long stap bos bilong Papua Niugini na ol provins, distrik na olgeta wan wan manmeri na pikinini.

“Yupela ol dua, yupela op. Yupela dua bilong bipo tru, yupela op bikpela, bai nambawan king i ken i go insait. Nambawan king, em husat? Em dispela God i save bosim bikpela lain ami. Em wanpela tasol em i nambawan king.” Buk Song 24: 9 – 10.

Ol pipel bilong dispela hap graun i bilip long wanpela nupela Kingdom gavman na stretpela gavman bai kamap.

“Long wanem, wanpela pikinini man i kamap pinis long yumi, em wanpela pikinini God i givim long yumi. Em bai i stap king bilong yumi, na em bai i gat ol dispela nem, Man bilong givim gutpela tingting tru” na “God i gat bikpela strong” na “Papa bilong i stap oltaim oltaim” na “King bilong kamapim gutpela sindaun na bel isi.” Dispela king bai i stap senis bilong King Devit, na em bai i sindaun long sia king bilong Devit na bosim ol manmeri. Strong bilong gavman bilong en bai i wok long kamap bikpela oltaim, na bai i no gat pait na ol manmeri bai i sindaun gut oltaim. Long wanem, dispela king em i king bilong mekim gutpela na stretpela pasin tasol, na dspela pasin bilong em bai i mekim em i stap strongpela king nau na olgeta taim bihain. Bikpela I Gat Olgeta Strong i gat strongpela laik tru long mekim gut long ol manmeri bilong en, olsem na em bai i mekim ol dispela samting i kamap.” Isaiah 9:6-7

Yu mas pre olgeta taim long ol senis i wok long kamap long kantri bilong yumi. No ken pret na seksek bikos long bikpela Goliat na yu em Devit na wantaim wanpela ston bai yu kilim traipela man. Tingim olsem samting we man i no inap long mekim, em God inap long mekim. Sapos God i ken bringim senis long Amerika, em inap tru long mekim wankain long PNG. God blesim yu.



# Ol Koiari i soim gutpela eksampel long ol arapela provins

OL pipel bilong Koiari long Sentral Provins i winim mak gen long taim gavman i opim nupela haidro pawa stesin long graun bilong ol long dispela wik. Dispela inamba tu haidro ilektrik pawa stesin long kamap longgraun bilong ol Koiari. Namba wan haidro pawa stesin em Sirinumu na nau dispela namba tu stesin, Edevu.

Dispela pawa stesin em kampani ol i kolim AG Investment Company bilong Sainai i go pas long en. Kampani i bin spendim moa long K600 milien long sanapim dispela nupela pawa stesin. Minista bilong Stet Enteprais i bin opim dispela haidro pawa stesin long Mande na bai dispela pawa stesin i givim 50 megawat pawa i go long helpim Pot Mosbi pawa saplai.

Dispela piksa bilong ol papagraunibel isi na tok orait long kampani i yusim graun na wara bilong ol long sanapim kain bikpela samting olsem haidro pawa stesin, em i mak bilong ol lain husat i laik lukim developmen i kamap. Ol i luksave long hevi bilong pawa i sot na ol i tok yes long yusim risos bilong ol long kamapim moa ilektrik pawa.

Kampani bai givim pawa saplai i go long ol asples yet na ol ples i stap klostu. Ol pipel bilong Sentral provins i amamas tu bikos planti yia nau ol i stap long tudak bikos pawa long Sirinumu i wok long go



Gowed Kuringne DIRD opisa i dring wanpela fres wara bilong maunten bilong Goilala. Kain wara olsem i stap long olgeta hap bilong PNG we inap kamapim ol pawa. Foto: Samson Kenderman, DIRD Komyunikesen Opisa.

tasol long NCD na wan wan ples long Sentral provins. Ol narapela hap long provins i stap long tudak.

PNG em i wanpela kantri we ol papagraun i save singaut oltaim long kompensesen sapos gavman i brukim promis bilong luksave long ol tu. Olsem na i gutpela long stretim wari bilong ol papagraun nau. Yumi mekim olsem bai long bihain taim, bai i no gat komplek i kamap long Edevu haidro pawa stesin.

Yumi olgeta i luksave long gutpela senis ilektrik pawa i ken

kamapim long laip bilong yumi. Wan wan famili i ken yusim pawa long mekim sindaun bilong ol i kamap gut. Ol haus sik na helt senta na ol skul inap long ran gut. Ol gavman dipatmenna sios na bisnis tu i ken mekim gut wok bilong ol bikos i gat ilektrik pawa long mekim wok i kamap isi.

Ol bisnis na sampela ovasis investa tu i ken kamap long ol ples ausait long NCD na givim wok long moa manmeri. Sapos i gat ilektrik pawa na gutpela rot na komyunikesen, bai ol investa na bisnis i ken kam insait na investim

mani bilong ol.

Dispela stori bilong ol Koiari pipel bilong Sentral Provins em i wanpela gutpela eksampel ol arapela ples insait long kantri i ken bihainim. Ol i yusim blesing Bikpela i bin putim long graun bilong ol, long helpim ol yet na ol arapela pipel bilong Sentral Provins na NCD tu.

Planti ples insait long kantri istap yet long tudak bikos gavman i no pulim pawa i go long olgeta kona bilong kantri. Tude PNG i gat tupela rot bilong kamapim pawa, haidro ilektrik na disel jenereta.

Disel jenereta i save kostim bikpela mani tumas. Planti ol jenereta i olupela na i save bagarap hariap.

PNG i no sot long ol bikpela wara o win o strongpela lait bilong san. Yumi gat ol dispela samting. Orait mobeta yumi mekim ol i wok long helpim sindaun bilong yumi. Planti moa kantri long wol tude i wok long yusim wara, san na win long kamapim ilektrik pawa. Ol i yusim sola eneji, na win eneji long kamapim pawa. Na watpo yumi PNG i sindaun lukluk i stap olsem ol tarangtu?

Yumi tu i ken yusim ol dispela samting long kamapim ilektrik pawa na givim sevis i go long olgeta hap bilong kantri. Tasolbipo long ol kain bikpela wok olsem i ken kamap, yumi wan wan papagraun i mas tok orait long givim graun i go long gavman long yusim na bringim sevis i kam bek long yumi. Sakrifais em i save kamapim pen, tasol gutpela bilong en em yumi ken lukim senis i kamap long plesna provins bilong yumi long planti yia bihain.

Dispela ol samting em i wok bilong ol plena na saveman na meri long glasim na tok save long gavman long hamas mani bai go long kamapim na wanem kain ovasis helpim kantri i ken kisim long kamapim wok. Yumi les long stap long tudak yet.

## No ken subim nus long laip bilong narapela, samting bilong em

BAI yumi tok wanem sosaiti mekim mipela kamap olsem o mipela yet i laik kamap olsem?

Dispela em subim nus o laik na tingting bilong yu long laip, wok o pilai bilong narapela.

Planti kain pasin i wok long kamap long famili, komyuniti, taun na siti bilong mipela.

Mipela i mas save mipela i kamap long kalsa we manmeri i save wok na stap.

Na husat manmeri i save stap nating em komyuniti i luksave olsem em i les man o meri.

Ol i save hevi inap kamap long kain man o meri olsem ol inap stap hangre o mekim trabel olsem go stil.

Mekim wok i save pulim tingting bilong ol manmeri we ol i tingting long wok bilong ol yet na i no save tingting tumas long laip na samting bilong narapela man o meri.

Tasol nau long dispela taim yu go long ol ples, ol yangpela planti em ol skul mangi i ting



ol i gat save na olsem ol i no ken holim graun o mekim han bilong ol i doti.

Na sampela em ol manmeri nating husat i lusim ples na i ting ol bai painim wok long taun tasol nogat.

Em dispela kain ol lain manmeri we i save laik suvim nus bilong ol long laip na samting bilong narapela.

Sampela taim i go pinis Skelim Tingting i go long Lae, Morobe provins na em i wokabaut wantaim sampela yangpela man.

Em i lukim olsem klostu olgeta meri i wokabaut, ol yangpela man i mas singaut long

ol, mekim sampela kain sain o givim sampela kain nem.

Na sapos wanpela meri i lukluk bek na i smail o lap, ol yangpela man bai tok ol i winim lewa bilong ol meri bikos meri i soim olsem em i gat laik long ol.

Na maski sapos dispela smail i min ol meri i sori long kain ol yangpela olsem ol i les na i no laikim ol, ol yangpela man bai subim laik bilong ol yet.

Kain pasin i mekim Skelim Tingting i paul. Olsem wanem? Bikpela i no givim tingting long man olsem em i ken save wanem samting i tru na wanem samting i giaman.

Em i ting wanem laip bilong meri i samting nating we wanpela i ken mekim samting long laik bilong em olsem em i ken go baim rais na tinpis long stua!

Kain pasin i kamap tu long ol arapela taun na siti na long ol lokal komyuniti.

I luk olsem ol manmeri i no

gat moa rispek long narapela na samting bilong em, maski em wok, pilai, haus o ples na graun bilong em.

Kain pasin em long tok Inglis mipela bai kolim olsem "attitude" hevi.

Manmeri i no moa skelim tingting sapos long em yet o aninit long pasin na lo bilong komyuniti, gavman o sios samting em i mekim i gutpela na i orait.

Taim manmeri i no givim taim long skelim tingting, dispela i ken kisim wanpela i go long pasin nogut.

Long ol bikpela opis, "attitude problem" i bin samting we i mekim pasin korapsen i go bikpela na rait bilong ol manmeri long kisim sevis i no gat na mekim sindaun i nogut.

Senisim pasin i bikpela wok mipela i mas mekim.

Kamap bilong gutpela Papua Niugini i stap long mipela yet, stat long bikman i go daun long liklik man.



Published Weekly, Thursday, for Word Publishing Company, Ltd.  
P.O. Box 1982, Boroko, NCD  
Papua New Guinea  
Telephone: (675) 325 2500  
Fax: (675) 325 2579  
Email: editorial@wantokniusepepa.com

Pe bilong wanpela yia  
52 niusepepa

Ples:	Air:
PNG	K220.00
AUSTRALIA	US\$110.00
ASIA PACIFIC na JAPAN	US\$150.00
AMERICA na EUROPE	US\$210.00

General Manager  
Elizabeth Konga

Editor  
Veronica Hatutasi

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general terms acceptance are available at Word Publishing Company Ltd and are set out full on the display advertising form.

# RSKMC mama grup strongim ol mama long ples



Marama Jessie Lowa wantaim ol mama bilong RSKMC long ples Galilo.



Revren Samson Lowa, Marama Jessie Lowa (sanap long han sut) wantaim ol mama bilong Revren Sioni Kami Memoriel Sios (RSKMC) sanap long ples Galilo.



Ol mama bilong Galilo Yunaitet Sios i soim plaua ol i mekim bihain long skul ol i kisim long ol.

**Shirley Gar i raitim  
UPNG Jenelisisum sumatin**

**LONG namba 25 mun Julai i go long namba 1 de bilong mun Ougas bilong yia 2016 ol mama bilong Revren Sioni Kami Memoriel (RSKMC) sios i bin mekim bikpela samting tru insait long ples Galilo Yunaitet sios we i stap aninit long Hoskins eria long Wes Nu Briten Provins.**

Dispela kibung tim i sanap olsem "Arise and shine" we i lukim lida, Marama Jesie Lowa na wanpela elda bilong ol mama Irima Mumu bin kisim moa long 30 mama bilong RSKMC Yunaitet sios kam long ples Galilo. Namel long grup tu em Revren Samson Lowa wantaim tupela yangpela man husat i gat save long kuk, somap na danis.

Dispela bung i bin tasim hat bilong planti mama, papa na pikinini husat i save kamap long bung wanpela wik olgeta.

Long taim bilong welkam, ol mama bilong Galilo Yunaitet sios i bin welkamim ol mama bilong RSKMC wantaim kanu danis we ol i bin kisim ol mama i go insait long haus lotu.

Bihain long olgeta welkam toktok i kam long wan wan lida man long ples, ol mama bilong ples i redim bikpela kaikai pig, taro, kaukau, bilong ol mama long RSKMC.

God i save wok long kain kain we olsem na dispela em wanpela we God i yusim ol strongpela wok manmeri bilong God long serim tok bilong God na tu andastendim laif stail bilong ples wantaim kalsa na pasin bilong serim samting, lanim kuk, somap, krietiv danis, givim na impoten tru em long eksasaisim bilip bilong ol insait long Jesus.

Bihain long welkam kaikai, Ol mama bilong RSKMC sios i givim presen long olgeta mama bilong Galilo Yunaitet

Sios. Insait long ol wan wan presen em besik nid bilong ol mama long ples olsem spun, naip, kolos, beg na tos lait. Ol mama long RSKMC sois i lanim tu ol mama long kukim ol nupela respi, bekim skon, mekim plawa long bilasim haus, haus lotu o opis. Ol mama tu i ken salim long maket long town.

Dispela bung i bin stap olsem tupela wiks. Long moning sesen ol mama i save gat sotpela lotu, namba tu sesen em long lanim long kuk, mekim plawa bilong bilasim haus lotu, opis, namba tri sesen em long belo kaikai, namba fo sesen em long nait we ol mama bai lotu strongim bilip bilong ol.

Namba tu hap bilong dispela bung em long visitim ol lapun manmeri na disebel. Dispela i lukim ol mama bilong RSKMC sios i visitim wan wan lapun na disebel insait long Galilo na lusim wan wan matres, kaikai na mani long olgeta lapun insait long ples Galilo. Em i wanpela bikpela samting tru insait long wok misineri. Bihain long dispela, ol mama i bin mekim wanpela profetik ekt we ol i bruk i go lon moa long 10-pela grup. Dispela 10 grup i go raunim ples Galilo prei na kapsaitim anointing wel antap long ol graun. Dispela ol ektiviti bin kamp long las-pela sarere long aut-ris bilong ol.

Long Las Sande olgeta manmeri long ples i bung lotu. Long givim tok tenkyu i go long Papa God we i mekim dispela bung kamap gut na long tok tenkyu tu i go bek long Ol mama bilong RSKMC. Ol mama long ples i redim mat, klos, laplap, t'siot na basket kaikai bilong wan wan meri bin kam long ples. Bihain long dispela wan wik progrem, ol mama selebret wantaim kaikai bung na samsam.

# No gat luksave bihain long rausim

Paga Hil manmeri go stap long 6 Mail 4-pela yia aninit long tent

Nicky Bernard i raitim

**OL Manmeri na pikinini husat save slip kirap long Paga Hill bipo i kisim bikpela hevi bihain long ol i muv go stap long siks mail insait long Pot Mosbi.**

Moa long 200 famili i bin lusim haus na ol samting bilong ol bihain long PHDC i kisim tok orait long bildim ol Hotel na haus long Paga Hill.

PHDC i mekim wanpela bigpela haus na givim wan-

wan famili tent bilong slip long 2013 na tokim ol famili olsem dispela ol tent em bilong liklik taim tasol bihain bai ol mekim gutpela haus bilong ol na dispela toktok ol dispela famili wetim 4-pela yia olgeta.

Long las wiken memba bilong ol long Mosbi Saut Justin Tkatchenko i bin raun i go lukim ol long givim sampela helpim long ol mama grup long hap na lukim stret long ai bilong em long ol

famili i save stap long dispela ol liklik tent aninit long wanpela bikpela haus olsem Hosel Haus.

I gat planti ol bikpela stori long hap long wanwan famili husat i save stap long ol dispela liklik tent.

Wanpela mama i stori long Minista Tkatchenko long taim em lusim liklik tumbuna bilong em aninit long dispela ol tent. Em tumbuna bilong em i gat 2-pela yia tasol taim ol muvim

ol kam long 6 Mail. Na taim ol stap tumbuna bilong em kisim sik na ol kisim em go long haus sik em dai. Mama ya tok tumbuna bilong em dai long taifoit sik.

Narapela mama i givim stori bilong em tu long taim ol muv long Paga Hill na kam sindaun long 6 Mail aninit long liklik tent. Em tok insait long wanpela yia long 6 Mail tent haus man bilong em i lusim em na go. Em yet i no save man bilong em go we

inap 3-pela yia nau. Em yet stap wantaim ol pikinini bilong em long dispela tent. Taim em lukim Memba bilong ol long wiken ai wara kam daun na tokim memba bilong em olsem em mas mekim gut ol liklik haus bilong ol long stap na ino insait long tent.

Dispela toktok na stori bilong ol mama long Ragamuga 2 risetelmen, i sutim stret lewa bilong Memba bilong ol. Na dispela i mekim

memba bilong ol i tokaut long plen bilong em we ol bai mekim ol haus long six mile na olgeta dispela famili bai go stap long en.

Planti bilong ol sori stori i stap long ol wanwan famili husat ol muv long Paga Hill na go sindaun long ol tent long Ragamuga 2 long 6 Mail. I gat famili long Niugini Ailan, Momase, Hailens na ol asples yet long Sauten rijen i stap long dispela hevi long slip long ol liklik tent.



Wanpela mama i tok klia long memba bilong ol, Justin Tkatchenko, long taim bilong ren wara save kam insait long tent bilong ol.



Dispela ol liklik tent ol kontrakta bilong Paga Hill givim ol wan wan famili long slip long en taim ol muvim long Paga Hill go long Siks Mail 4-pela yia go pinis.



Wanpela Niu Ailan man i stap namel long ol famili husat i muv long Paga Hill na go stap long tent long 6 Mail. Em sanap wantaim memba bilong em.



Wanpela mama i kra i wantaim na tokim memba bilong em olsem man bilong em bin lusim em tai mol muv long Paga Hill na kam long 6 Mail. Em yet stong na stap long tent wantaim ol pikinini bilong em.



Dispela mama man bilong em lusim em taim em muv long Paga kam long 6 Mail. Dispela hap ol sanap long en em ples ol save slip long en.



Memba bilong Mosbi Saut na Minista bilong Sports na APEC i lukluk long ol pikinini husat i muv wantaim ol papamama bilong long Paga Hill na kam long 6 Mail 4-pela yia go pinis.

# Danis tumbuna i lus long ol yangpela long Siti

Nicky Bernard i raitim

OL Danis tumbuna bilong ples i wok long lus isi isi long ol bikipela siti insait long kantri bilong yumi PNG.

Dispela long wanem pasin bilong ol wait man i kam hariap na strong long ol bikipela siti long PNG.

Sapos yu askim wanpela yangpela mangi bilong Hailens, Momase o Niugini Ailan long bikipela siti long danis tumbuna, em bai paul olgeta.

Tumbuna danis em ol yangpela long ples bai save gut tru long wanem ol stap long ples na taim ples lain i holim wanpela bikipela bung ol save danis wantaim ol lapun bilong ples na kisim stail bilong ol lapun long danis na singsing.

Kalsa De long ol skul insait long siti tu i no save helpim long soim ol pikinini long wei bilong danis tumbuna long wanem ol mammeri save lainim ol pikinini tu kam stap long siti na fomula o peten bilong danis ol lus ting pinis na giaman ol sumatin tasol long danis na bilas.

Planti danis tumbuna nau i wok long lus isi isi long siti, ol wait man kam wantaim mobail fon na tingting bilong ol yangpela nau em stap long pasin wait man na tumbuna pasin i no gat moa long tingting bilong ol.

Sapos yu askim wanpela pikinini o manmeri we i stap long Mosbi siti long danis tumbuna em bai givim stret ansa olsem em i no save long danis tumbuna.

Ats na Kalsa i save kamap olgeta 4-pela yia na dispela i no gutpela tumas long ol pikinini bilong nau. Foa yia em longpela taim long ol yangpela manmeri bilong ples. Taim Ats na Kalsa kamap bihain long 4-pela yia ol yangpela manmeri kisim pasin bilong wait lain long sistem bilong ol pinis.

Ats na Kalsa mas kamap olgeta tupela yia long strongim kalsa na tumbuna pasin bilong yumi ol Melanesia Kantri. Ating ol narapela Melanesen Kantri i holim strong kalsa bilong ol na yumi PNG i wok long lus isisi na bai pinis klostu taim.



Ol manmeri bilong Okapa long Isten Hailens long Sikis Mail i danis tumbuna long welkamim Memba bilong ol Justin Tkatchenko. Poto Nicky Bernard.

## Kona Bilong Poem...



(inside the mind of an idealist)  
(By: Anonymous)

Outside my mind's view  
The greenest pastures  
Mortals with cloudless virtues  
Beyond, the great spread of humanity  
Where the heart is free  
And to our creator, praises due

A day dawned anew  
Immersed in children's laughter

Hope sparkles and glimmer  
Outside, the joy of humanity  
Peace-makers run spiritedly  
And to our creator, praises due

Mother Earth, the stage in view  
All men, protagonists for the day  
Where brotherhood the plot to play  
Flowing, the stream of humanity  
Where the soul is at liberty  
And to our creator, praises due

One glorious history so renewed  
Its pages cleansed of bloodstains  
No chapters birthed from  
gloomy brains  
In the great scheme of humanity  
Where the mind, perpetual  
state of serenity  
And to our creator, praises due

An idealist's point of view  
If all were to share his fantasy  
Where no more the masks of brutality  
The human spirit need not be broken  
Where sacred is the blood of human  
And to the creator, all praises due



## Sunset Girl Poem

(By Jessie Ketan)

She had long shiny black hair  
Dark and beautiful like the darkness of 3am  
I once saw her in her traditional attire  
She looked amazing  
Indeed she was a queen and an angel  
Island beauty  
Fine jewel of Melanesia  
From the island of beautiful sunsets  
My sight catches your curves  
Outlined by the silhouettae  
Your figure against the golden sunset  
Extrudes my soul  
Come closer dear  
So fine and pretty  
Take my hand and lets walk  
Beside the sea on a golden sunset evening...



# STORI BILONG TUMBUNA

## As tru pisin perot i save kaikai long gaden

**L**ONG taim bipo, i bin gat lupela marit nem bilong man Sui na nem bilong meri Poseu. Tupela tasol i save stap na mekim ol liklik wok bilong tupela. Tupela i nogat pikinini tu long wanem Poseu i save kilim i dai bebi bilong tupela long taim bilong karim. Tupela i nogat luksave long gutpela bilong gat pikinini.

Wanpela taim wanpela Perot pisin i plai antap long haus bilong tupela na harim tupela i wok long toktok long kilim nupela bebi bilong tupela. Pisin ya i bin harim na bel sori tru. Wan tu, em i palai i go daun long tupela na tokim tupela olsem, "Sui na Poseu, yutupelanogat sori long dispela pikinini? " Plis, mi askim yutupela long noken tru kilim pikinini bilong yutupela na lukautim tasol inap em i bikpela na bai yutupela lukim gutpela bilong pikinini"

Bihain dispela Perot pisin i plai i go. Tupela marit i bin faul tru na i no bin wanbel tasol tupela i harim tok bilong Perot pisin na lukautim bebi bilong tupela. Long dispela taim perot pisin i save raun long haus na singim switpela song long bebi bikos tupela marit bai noken kilim nemsek bilong em 'Langa'.

Taim dispela bebi i kamap bikpela, em i save helpim gut tru mama papa bilong em. Langa i save go kilim abus long bik bus, hukum pis long nambis, wok gaden, na mekim kainkain wok. Mama na papa bilong Langa i save hamamas nogut tru bikos pikinini bilong tupela Langa i save long wok.

Wanpela taim Perot pisin i plai lus na lukim Langa i katim bikpela diwai. Emiplai go daun na toktok wantaim tupela marit. "Lukim, pikinini bilong yutupela em impoten long yutupela long dispela

wei." Sapos yutupela i bin kilim em, bai yutupela yet inap, long mekim ol wok bilong yutupela?"

Sui i bin sem nogut tru, na tokim perot pisin olsem, "Mi tok amamas long gat pikinini nau. " Tenkyu tru long ol tok edvais bilong yu, tasol mi nogat wanpela samting long soim tok tenkyu bilong mi."

"Mi no laikim planti samting, tasol mi laik tok tasol olsem, long olgeta gaden pikinini man bilong yu i mekim, mi bai pes man long kaikai. Em tasol presen bilong mi," Perot pisin i tok.

Wantaim dispela, perot pisin i pilai lusim tupela. Olsem na nau, u bai lukim olsem Perot pisin i save pes long kaikai kon, popo, na hap mau banana long gaden.

*Rondi Bosravis-Agat i raitim (Shirley Gar i tanim i go long tok pisin)*

## Snek meri

**S**tori tumbuna i soim solsem Ailan Lovongai, i gat 12-pela klen we i stap nau. Nem bilong ol, Kikiu, Sui, Vengevege, Nguma, Langa, Tien, Manilava, Gila, Kiting/Silau, Valua na UK.

Dispela tumbuna stori bai stori long kamap bilong klen Sui insait lovongai ailan insait long Niu Ailan Provins. I gat wanpela mangi, nem bilong em Natineipies. Em i save stap wantaim papa mama bilong em insait long liklik bus haus nem bilong en Patipalik we i save stap long nambis bilong ples Meterangkasing.

Wanpela de, Natineipies i laik raun lukluk i go long ples Tingolaun, we i stap antap tru long maunten. Taim em kamap long rait han sait bilong maunten, em i lukim wanpela kiau we i luk wankain stret olsem kiau bilong pisin.

Natineipies i kisim dispela kiau na karamapim gut wan-

taim gras long mekim kiau hot na em i lusim ken long ples bilong en na i go. Long apinun, em i go bek ken long haus.

Bihain long sampela wik i lus, dispela kiau i bruk na wanpela kain enimel kam autsait. Dispela enimel i karim het bilong meri na bodi bilong snek. Nataneipies i putim isi dispela enimel insait long bilum na karim igo long haus.

Em i lukautim snek meri gut tru inap em i kamap bikpela hariap tru. Taim dispela snek meri i kamap bikpela, tupela i


marit na kamapim 10 pela pikinini. Taim 10 pela pikinini i bikpela, ol i bin marit na kamapim 10 pela ples insait long Westen hap bilong Nu Hanova ailan.

Nem bilongol ples em : Meterangkasing, Neitab, Tunung, Tabut, Noipuas, Unga, sosson, Kung na Umbukul.

Long taim bilong hevi, ol i save helpim wanpela nara-pela.

*Stanley Nohu i raitim (Shirley Gar i tanim i go long tok pisin)*

## Em nau! Ol pikinini i ken painim rot i go long ples wantaim Wantok lain...



Yu pinis! Em ples bilong yu

Ansa bilong Wod Pilai isu 2211

# PAINIM WOD PILAI

Ol wod lista:

- |                 |                 |                |
|-----------------|-----------------|----------------|
| <b>LAKI</b>     | <b>DAUN</b>     | <b>KLINIM</b>  |
| <b>MAIS</b>     | <b>KALOP</b>    | <b>SANDE</b>   |
| <b>BIKTAUN</b>  | <b>LATA</b>     | <b>WANPELA</b> |
| <b>DAI</b>      | <b>BIPOTAIM</b> | <b>KUMU</b>    |
| <b>FOM</b>      | <b>KATU</b>     | <b>PINDA</b>   |
| <b>HANKISIP</b> | <b>PANISIM</b>  | <b>TAIT</b>    |
| <b>ATAP</b>     | <b>RERE</b>     | <b>YAR</b>     |

X Y H D O S K E X E E Y M G A N W T S W K H J R Y  
R X P Y E N O J O N N F F K O A H L I B N S H L M  
R E P D H Z R B X R P C G C S G T M A I S C P E U  
G O A I C S E S E U T E N O V I B A D K K O N L G  
N T I E D G E M T T N O S L M R I T P T L A K I C  
I N M P U H A O S X D F G W A N P E L A I Q J R P  
K U Y M S E G S D E B S G Y V I O S K U N S G A T  
H T O M A J E I E R E R E E S I T A S N I I Z L M  
L C I W R C E D G I M P P I C K A N I S M L S A H  
M O C T M O P S I O B I K E S V I D A U N S Q I X  
G S N O S E S H F N E N E L L I M E O N L R E R M  
E D G S N E X A D F A D D A I O F R Y D P M C D D  
S G V C L L E A S H T A I T I Y A S I L O I H N N  
I E O X I D A L I K U M U A B W P U C C I X S P P  
O H X Y E O I T Z Z K S H R C R P X S N O S C A E  
Q E N I A U G J P S A T E T T F H S O Q E P W C E  
R X O O P E R H A K T T T T I C R L R T O E S U M  
A N N Y P M O N A D U F C Y S T N D L I O P N P M  
R M E L D I M F S G S P M C I Y L L E C E S S D F  
E N H E E E O F E T C Z X T E C E J I R Q G N Q V

R N K N D N W O Q S P I E S T B J P J K Y T S S S  
C N D E I K T S R F S P S I F L W E E S V S R E T  
O C T I Y D H P W M D C R S E E T G C Z U A N R E  
E S F C H U S I K T A T E S H A M C O O K S E L Y  
E N S E O J G E W I O Z N A L G R D F G C H D C U  
F G S N T U C P E G E T T E E O B E A E T B O E N  
O E Z R U M Y X H O O R O N R T R E A T A O T Y X  
W L F P A M C I B T O T N A I F H Q F D I U L S O  
O Z Y H G U M T A O F C I P I V H O N O A E E H T  
H E E P W I S F R G I O C B N N G O G M I I B R E  
A A N O Y I O N O N S Y J G K R Z H N I I V H I R  
Y M P S J C T W A N W I N L M E K W E N G F L P E  
V G Q S I Q G P E V S C S P O W A R F I D Z D N T  
P L B S E L F P A I O P E T R N R S H N T J P I X  
I E R T E S S I N G S I N G A M E B A A N K M K  
I U U G M O R A A M N C F M C K D R H K E I U O X  
B H S I S I D D R W N C A M O K A U O S T B L A S  
W S A N U M G O T A G S E H M E R M E T M E A I H  
B T A T A N G U L D M A L K U K U R A I Y C U A S  
O W T D E M O I A A I L E E G R P P L E N T I F



# TOK PISIN NEWS

from Radio Australia  
radioaustralia.net.au

Harim TOK PISIN long  
Radio Australia  
**101.9FM**  
Port Moresby

**Tok Pisin Service**  
6am - 7am 6080; 7240(KHZ)  
7pm - 9pm 5995; 6020; 9710; 1280(KHZ)

## PNG na Australia gavman i mas rausim ol Manus refuji hariap: Don Polye

Caroline Tiriman i raitim

Papua Niugini Opoisen lida, Don Polye i tok tupela gavman bilong PNG na Australia i mas hariap na autim ol refuji na asailum sika long Manus Ailan bi-hainim toktok bilong PNG Suprim Kot.

Mista Polye i tok tupela gavman i mas lus tingting long salim ol moa long 1000 ol refuji na asailum sika em ol i stap long PNG na Nauru long go stap long Amerika.

Em i tok Presiden bilong Amerika, Donald Trump i gat strongpela tingting long i no laik long kisim ol pipel i



Ol asailum sika i kalabus long Manus.

kam long 7-pela muslim painim sampela arapela wei kantri, we planti long ol refuji long PNG i kam long en. Mista Polye i tok tupela Australia na PNG gavman i mas

## Trabel long komyuniti bai no pinis taim ol asailum sika na refuji i stap long Manus

Caroline Tiriman i raitim

OL asailum sika na ol refuji long Australia asailum ditensen senta long Manus Ailan long Papua Niugini bai nap go het long kamapim trabel long komyuniti inap Australia na PNG stopim dispela kain wok.

Loiya bilong ol refuji na asailum sika, Ben Lomai i mekim dispela toktok bihain long kot i bin sasim wanpla asailum sika long reipim wanpela yangpela meri long Manus long wik i go pinis.

Em i tok asua i stap stret long han long ol gavman bi-



Ben Lomai na tupela loa bilong Australia we i save helpim em.

long Australia na Papua Niugini long wanem em i tok tupela i slek tumas long stretim na rausim tru ditensen senta.

Long wik i go pinis, memba bilong Manus Open, Ronny Knight i bin tokaut

olsem em i no bin kirap no gut long dispela kain trabel i wok long kamap long Ailan long wanem, ol asailum sika na ol refuji i save raun nating nating long ol ples bi-hainim laik bilong ol.

## Gold Ridge Len Ona Kaunsil i amamas long wok bilong opim bek gol main

Sam Seke i raitim

Siaman bilong Gold Ridge Len ona Kaunsil, Dick Douglas i tok ol i amamas long Solomon Ailan gavman i luksave na helpim ol long wok bilong opim bek dispela gol main long Sentral Guadal kanal.

Main i stop wok long Epril 2014 bihain long ol bikpela hevi i kamap long telings dem na papa bilong kampani i lusim St Barbara na i go bek long Australia.

Kampani bilong Gold Ridge Len Ona Kaunsil, Goldridge Komyuniti Invesmen i bin tekova long taitel



Gold Ridge main long Sentral Guadal kanal long Solomon Ailan.

bilong Maining Los eria na em i kisim wanpela kampani we i gat beis long Melbourne, AXF Grup long developim dispela main.

Mista Douglas i tok ol wok bilong opim bek Gold Ridge main i kamap gut na olgeta i amamas long helpim bilong gavman.

## Pipel long Solomon Ailan i mas go tokaut long ol korap lida

Sam Seke i raitim

PRESIDEN bilong Forum Solomon Ailan Intenesenel (FSII) i givim strong long ol pipel long ol i mas tokaut long nius na long sosel media long ol pasin korapsen we ol lida i save mekim. Banjamine Afuga i mekim dispela toktok bihain wanpela ripot bilong korapsen long wol i soim sampela gutpela senis i kamap long korapsin long Solomon Ailan.

Korapsen insait long ol sistem bilong gavman long Solomon Ailan wantaim ol narapela kantri bilong Mela-nesia tu em i wanpela bipela hevi yumi save harim olgeta taim.

Transparensi Intenesenel 2016 Korapsen Pesepsen Indeks bilong Solomon Ailan i bin soim bigpela impruvmen long korapsen. Long 2011, Solomon Ailan i bin stap

long namba 120 na i soim olsem i no gutpela mak long sait bilong korapsen. Tasol nupela ripot bilong Transparensi Intenesenel we ol i autim long las wik, i putim Solomon Ailan long namba 72 we em i bikpela senis namba i go daun long 120.

Papua Niugini i em i narapela Pasifik Ailan kantri wei gat CPI renking tu na em i stap long daunbilo tru 136 namel long 176 kantri.

Solomon Ailan em i gat skoa bilong 42 namel long 100 na Papua Niugini i kisim skoa bilong 28 namel long 100. Olgeta narapela kantri we i gat wankain skoa olsem PNG em; Nigeria, Myanmar, Lebanon, Kyrgyzstan na Guatemala

Nu Silan na Denmark em tupela kantri we i stap long namba wan long top bilong lista we tupela i gat skoa bi-

long 90 namel ong 100. Australia em i stap long namba 13 wantaim skoa bilong 79.

Forum Solomon Ailan Intenesenel em i wanpela sosel media grup long kantri. FSII i save toktok olgeta taim na em i gat ol post long Fesbuk long olgeta kain toktok na stori bilong korapsen long kantri.

Presiden bilong FSII, Banjamine Afuga i tok dispela mak bilong Transparensi Intenesenel em i gutpela sain long pait bilong rausim korapsen long Solomon Ailan.

Mista Afuga i tok strong long olgeta lain long kantri long go het long tokaut long ol stori bilong korapsen ol save gut long em. Em i tok tu olsem ol lida i mas save olsem ol pipel nau i save lukluk long ol na ol i no inap hait sapos ol i mekim ol samting i no stret.

## Solomon U-17 soka i kenselim frenli gem long Australia

Sam Seke i raitim

SOLOMON Ailan Futbol Fed-eresen i lusim plen bilong em long nesanel anda-17 tim bilong kantri long go pilai tripela mets long Brisbane, Queensland, pastaim long ol i go long OFC Anda-17 Sempionsip long Tahiti.

Eksekyutiv Opisa bilong SIFF, Joseph Boso i tok dispela em bilong ol i kisim ol nupela Visa bilong Australia tasol dispela mekim hat long ol i kisim ol visa bilong ol pikinini long tim.

Em i tok nupela plen nau em bilong ol i go long Fiji, na go pilai wanpela frenli mets wantaim wanpela yut sait long Nu Silan pastaim long ol i go long Tahiti.

Mista Boso i tok long sait bilong Nu Silan Visa em i no gat hevi, na em i amamas long ol imigresen bilong Nu Silan i helpim ol gut tru.

Oceania Konfederesen

Anda-17 Sempionsip long Tahiti bai stat long Sarare neks wik, na tupela tim we i kam pastaim na bihain bai go long Anda-17 Wol Kap Cup long India long mun Ogas.



FSII i wokim fan reising long helpim Solomon U-17 long go long Tahiti OFC Sempionsip.

## ABC Redio Australia sotweiv brodkas i pinis

Caroline Tiriman i raitim

MANDE dispela wik em i laspela de bilong Sotweiv Redio Transmisen sevis bilong Australia Brotkasting Koporesen (ABC) we planti pipel long Pasifik rijon i save harim moa long 80 yia nau.

Redio Australia, we em i hap bilong ABC Intenesenel i save brodkas long sotweiv i go long planti kantri long Pasifik, wantaim tu Papua Niugini, Solomon Ailansna Vanuatu.

Dispela tingting bilong ABC long stopim Sotweiv sevis em

i kamapim planti wari long rijon long wanem ol i save lukluk long Redio Australia long ol nius, stori, na tu long ol taim no gut olsem saiklon, graun i Guria, sunami na ol narapela kain disasta.

Nau sampela senia opisa bilong disasta long rijon i tok ol i wari tru olsem dispela impoten sevis bai pinis nau.

Wanpela long ol em Peter Korisa, bilong Nesanel disasta menesmen opis long Vanuatu husat i tok Redio Australia sotweiv sevis em i save bringim ol gutpela helpim long taim no gut na

tu long ol gutpela taim. Narapela senia opisa husat i gat wankain wari em Deputi dairekta bilong Solomon Ailan Meteorological Sevis Lloyd Tahani.

ABC i tok taim em i stopim sotweiv sevis em bai strongim ol wok bilong bringim FM sevis na tu intenent, tasol bosman bipo bilong Redio Australia, Jean Gabriel Manguy i bin tok long mun i go pinis olsem FM na intenent i no gut long planti pipel long Pasifik long wanem ol i stap long ol bus ples o ruel eria.

# Romania gavman i rausim tok save bilong korapsen



Wanpela protes rali long Timisoara, Romania long Sarere nait.

ROMANIA i rausim wanpela bikpela toktok bilong korapsen long Sande bihain long ol bikpela demonstresen i kamap, tasol ol poresti i wok long putim presa yet long strit inap 6-pela de olgeta.

Taim planti tausén pipel i bung long Bucharest na long narapela hap, gavman i tokaut olsem em i bin givim tok orait long rausim dispela toktok bilong korapsen we inap long em bai lo, bai no ken karamapim sampela

hap bilong korapsen. Dispela i bihainim tok promis we Praim Minista Sorin Grindeanu i bin mekim long Sarere bihain long namba 5 de bilong bikpela demonstresen tru winim ol narapela olsem long 1989

demonstresen we ol i bin rausim komunis dikteta Nicolae Ceausescu.

Ol demonstrata i bin bung long Sande long mekim klia olsem ol i no laikim tok save bilong gavman na ol i mekim klia long lef-wing gavman bilong Grindeanu olsem korapsen i mas kamaut.

“Mi hop olsem dispela em i trupela toktok bilong rausim. Mipela bai putim ai long ol long ol i no ken paulim mipela,” Daniel, wanpela 35 yia protesta i tok.

“Tude mipela bai brukim nupela rekot,” Florian, wanpela ilektrisen i gat 40 krismas i tokim AFP long Bucharest, taim em i wok long givim aut ol fri pretzel na ti long Cicori Skwea, namel long ol protes long dispela wik.

Ol pipel i bung long skwea na ol i holim ol bikpela posta wantaim ol toktok na ol i singaut, winim wisel na ol plastik vuvuzela hon wantaim ol

nesenel kala blu, yelo na ret.

Tok lo we Gavman i wokim long las wik Tunde na i laik strongim long 10 Februari, em long ol i laik mekim olsem, taim wanpela man long gavman i yusim pawa bilong em long mekim disisen krangi long wanpela mani, em bai go long kot tasol sapos mani i winim mak bilong 200,000 lei (38,000 Euro).

Gavman i laikim tu narapela lo bai palamen i lukluk long en neks wik em bilong larim fri 2,500 kalabus man husat i stap kalabus aninit long 5-pela yia.

Grindeanu bilong left-wing Sosel Demokret (PSD), i bin tok olsem ol dispela disisen em bilong bringim penal lo o lo bilong ol man mekim rong aninit long lo, i kam aninit long konstitusen na mekim isi long holim planti kalabus manmeri tumas insait long ol haus kalabus.

Tasol ol lain i no wanbel na

i tok olsem em i ples klia olsem PSD gavman i laik traim long larim planti ol opisa na ol lo meka husat i gat rong bilong korapsen long go fri. Dispela wok bilong strongim lo bilong korapsen i bin lukim klostu 2,000 pipel i bin asua long yusim pawa bilong ol long kamapim pasin korapsen namel long yia 2014 na 2016, na wanpela praime minista, 5-pela minista, 16 lain bilong kamapim lo na 5-pela seneta i bin sanap long kot.

Grindeanu i tok long Sarere nait olsem em i no laik kantri bai stap bruk olsem na olgeta lain i bung i singaut amamas long em na pati i go inap biknait. Tasol em i tok gavman bai i mas bringim ol lo i kam bihainim konstitusen, na em i tok bilas long samting em i kolim olsem wanpela kempen we rong tok save i go aut long en.

## Isis baim ol fi bilong ol man i stilim ol pikinini bilong ol refuji



Ol refuji pikinini bilong Syria i stap long wanpela kem klostu long Taalabaya long Lebanon. Ol kain pikinini olsem we i no gat bikpela lain i lukautim i stap long birua bilong ol jihadi grup inap stilim ol.

Islamik Stet i wok long baim ol bikpela stilman bilong ol refuji pikinini long wanem ol i kisim taim long traim long kisim ol nupela memba bilong ol. Wanpela ripot i tok olsem ol dispela kain pikinini i stap abus stret bilong ol kain stilman olsem. Ripot i kam long kaunta-ekstrimisem thinktenk Quilliam i tok tu olsem samting olsem 88,300 pikinini i no gat bikpela man o meri i lukautim. Yuropien Yunien polis rejensi Europol i luksave olsem em ol pikinini we i bin lus, tasol ol stap long birua bilong stilman.

Ripot we i bin kamaut long Mande las wik i toktok long ol asua bilong Yurop, kantri olsem UK, long ol i ken banisim ol pikinini refuji husat i wok long wokabaut ol yet. Em i tok lukaut olsem jihadi grup olsem ISIS na Boko Haram i traim pinis long kisim moa memba insait long refuji kem na tu ol i wok wantaim ol lain i stilim ol pikinini.

Quilliam i tok olsem ISIS i makim mani mak bilong \$2000 (1,600 Euro) long kisim ol nupela memba insait long ol kem long Lebanon na Jordan. Long yia i go pinis ol Jordanien spesel fos i bin tok olsem ol i painim wanpela slip sel bilong ISIS insait long wanpela refuji kem klostu long Irbid, Not Jordan. Moa ripot i soim olsem ISIS i bin traim long kisim nupela memba long ol refuji wantaim ol kaikai we pastaim ol i no bin laik givim long ol lain insait long ol kem.

Nikita Malik, wanpela senia ripota long Quilliam i tok: “Ol yangpela asailum sika em i stap long mak bilong ol lain grup bilong pait bikos tingting bilong ol i isi long lainim nupela samting olsem na em i isi long lainim ol nupela kain tingting na mekim ol kamap man bilong pait na long ol yangpela gel, ol i ken kamapim nupela lain bilong ol i ken kisim long bihain taim. Dispela ripot i tokaut

long nesanel na intenesenel rot long daunim birua bilong ol man i stilim ol pikinini na lainim ol long pasin bilong pait na kilim man na tu long kamap wokboi nating long kain taim olsem.

Malik i bin luksave tu long we ol Jihadi grup i wok long putim mak long ol refuji long ol giaman tok pepa bilong ol. Long Jun bilong yia i go pinis i kam inap long las mun, em i painim 263 taim we dispela kain grup i bin traim long toktok long ol refuji long senisim tingting bilong ol long kamapim pait namel long ol jihad na ol lain i no bilip o long bung wantaim ol lain bilong pait na long senisim ol i go long Islam.

Lukluk long ol stori bilong ISIS long internet Taliban, al-Qaida, al-Shabaab long Somalia na Boko Haram long Nigeria, ol save lain i painim 4-pela Isam grup i toktok long ol refuji olgeta de namel long 13 Jun na 8 Januəri 2017.

## Netanyahu raun long taim UK na EU i no gat wanbel long toktok bilong Israel



Ol Israeli setelmen lain i protes long ol i rausim ol long setelmen autpos bilong Amona we ol i bin wokim antap long Palestin graun.

SINGAUT bilong Praim Minista Benjamin Netanyahu bilong Israel long pait egens long Iran na long banisim ol setelmen program bilong em long Wes Benk long taim em i go raun long Downing Strit long Mande em i luk olsem bai kamapim ples klia bruk namel long British foren polisi i go long Washington na laik bilong Theresa May long holim gutpela wanbel pasin wantaim Yuropien Yunion pastaim long Brexit.

Ol Yuropien lida long Malta samit long Fraide i tokaut long pret bilong ol olsem Trump em i wanbel long lukim dispela bruk i kamap namel long EU. Ol i pret tu olsem May bai laik painim ol pren bihain long Brexit na em bai traim long go sait wantaim Trump na Netanyahu long em bai go isi wantaim oposisen bilong UK long ol seltelmen o long singaut long lukluk gen long Iran nuklia dil we ol i bin sainim long Julai 2015.

Kirap nogut bilong EU long

lukluk bilong Briten long Israel ating i maus wara nating. Tasol em i kamapim wanpela bruk gen namel long Anglo-French wantaim tingting olsem Briten i strong long resolusen 2334 long Yunaitet Nesens long 23 Desemba long tok daunim ol ilegal Israeli setelmen na go klostu moa long luksave long Palestin stet. Em i mas gat narapela kain tritmen bilong Israel insait long 1967 boda, na sinagut long stet long luksave long ol toktok namel long teritori bilong Stet ov Israel na long ol teritori we ol i bin kisim long 1967, em samting we inap long kamapim rot bilong ol sanksen olsem ol boycotts.

Long namba wan taim US i no mekim vot long resolusen egensim Israel. Blobek long Briten na long ol Amerika em i kamap hariap tasol insait long ol de UK i luk olsem i senisim toktok bilong em. May i tok bilas long John Kerry husat i bin stap olsem US Seketeri bilong stet, long tok bilas long

Israel gavman olsem gutpela raitwing tru long histori bilong em.

Briten i les long salim opisal deligesen long wanpela de long Midel Is pis konpresen we ol French gavman i redim long Paris. Moa long 30 foren minista na ol mausman bilong 70 kantri i bihainim wok na kamap long Sande 15 Januəri. Tasol UK i no salim wanpela minista o embeseda bilong em long Frans, na em i tok ol lain i stap em ol i no gat bikpela wok tasol ol i stap long lukluk tasol.

Long taim bilong pasim tokaut long Paris konpresen em i bin go moa long helpim Israel na i no olsem pastaim ol i bin autim hait draf pepa we UK i bin tokaut long publik olsem em i no wanbel long dispela tokaut.

Tupela moa toktok wanpela long EU foren afeas kaunsil long de bihain, i sapotim autkam bilong Paris konpresen na narapela long UN wanpela de bihain we Briten i no wanbel long en.

# Juffa: Manmeri no gat sans long mekim bisnis

## Aja Potabe i raitim

**SANS** bilong manmeri PNG i mekim bisnis i wok long lus taim ol forena o manmeri bilong narapela kantri i kam insait na kisim olgeta.

Gavana bilong Oro, Gary Juffa, i tok manmeri bilong PNG i wok long lusim sans bilong wok tu bikos planti manmeri bilong narapela kantri i wok long kisim wok we manmeri PNG inap long mekim.

Mista Juffa i no wanbel long gavman i no stopim na sekim gut ol lain i kam long sampela kantri na i laik wok na mekim bisnis long hia.

Em i tokim Palamen long las wik olsem nesenel sekyuriti sistem bilong kantri i no stap gut na ol manmeri long arapela kantri i wok long kam insait long PNG na mekim long laik bilong ol yet.

"Dipatmen ov Leiba na Industrial Rilesens i wok long givim wok pemit nating long ol forena. Planti manmeri bilong narapela kantri i kam long PNG i no save long tok Inglis," Mista Juffa i tok.

Mista Juffa i tok tok Inglis em i wanpela namba wan samting we ol forena husat i laik kam wok o kam mekim bisnis long hia i mas save.

Tasol planti i no save long tok Inglis. Ol i kam na wok olsem sekyuriti, masin opereta, draiva, stua kipa, na mekim arapela liklik wok we PNG manmeri yet i



Gavana bilong Oro, Gary Juffa.

ken mekim.

"Sans bilong ol manmeri bilong yumi yet i mekim dispela kain ol wok i no moa stap," em i tok.

Mista Juffa i tok long provins bilong em long Oro, em i bin kirap nogut long painimaut olsem sampela man Saina husat i wok long wanpela kampani bilong Saina, i no save long tok Inglis.

"Mi kirap nogut long lukim olsem ol lain bilong yumi long gavman atoriti i wok long larim dispela kain ol manmeri i kam insait long kantri," em i tok.

Mista Juffa i tok ol manmeri long wanpela kantri

klostu long India ol i kolim Bangladesh nau i pulap long Pot Mosbi.

"Nau liklik sans bilong mekim bisnis i wok long lus. Ol manmeri Bangladesh i kam insait na statim liklik stua na taka bokis long Morata, Gerehu, Hanuabada na 9-Mail," em i tok.

Mista Juffa i no wanbel long ol manmeri bilong yumi i wok long mekim bisnis long hot san long Waigani maket na Godons maket.

Sampela taim ol polisman i save raunim ol, bagarapim maket bilong ol, tromoi tia ges i go long ol, na raunim ol olsem pik dog, em i tok.



Jeneral Menesa bilong Riteil, Paul Thornton.

diposit long BSP i go daun. Nupela intres reit em i 29.9 pesen long wan wan yia.

"Ol kastoma i no nidim sekyuriti long kisim BSP Pesonel Lon na ol i ken kisim long mak bilong K50,000. Ol kastoma husat i save kisim mani long olgeta wik o mun i ken kisim dispela dinau mani," Mista Thornton i tok.

Long fainensal literesi program, BSP i trenim moa long 32,000 manmeri PNG long yia 2016 na 46 pesen bilong dispela namba em ol meri.

# Antelope-7 i mekim sait trek driling

ANTELOPE-7 ges fil long Petroleum Ritnsen Laisens (PRL) 15 long Galp Provins i wok long mekim sait trek driling.

InterOil Corporate i autim dispela ripot long las wik taim mak bilong driling i kamap long 2, 127 mita (6, 978 fit).

Opereta bilong PRL 15, Total E&P PNG Limited, i bin bungim sampela hevi long Orubadi Fomesen taim ol i wok long mekim ol driling wok long Antelope-7.

Dispela i lukim Total i mekim sait trek driling. Sait trek driling em i save kamap taim bikpela ston i save blokim rik i go long graun long rausim oil na ges.

"Total i wok long mekim sait trek apraisal wel driling long Antelope-7 bhain long ol i bin painim hevi long dril i go daun moa yet," InterOil i tok.

Ol ripot i kam long Total i soim olsem Antelope-7 sait trek apraisal wel i kamapim 1, 980 mita (6,496 fit) driling long Orubadi Fomesen.

Ripot bilong dispela driling wok bai soim hamas ges risev i stap long Antelope-7.

Dril bai stop long 2, 300 mita (7, 545 fit).

Antelope-7 i stap 1.25 kilomita longwe long saut-wes bilong Antelope-5.

InterOil i holim 36.5375 pesen intres long Antelope-7 wel. Total E&P PNG Limited i gat 40.1275 pesen intres, Oil Search i holim 22.8350 pesen, na arapela liklik kampani i holim 0.5000 pesen intres long Antelope-7 wel.

## BSP gat nupela meri dairekta

WANPELA meri Samoa i kamap nupela dairekta na bod memba bilong Bank South Pacific (BSP).

Bod siaman bilong BSP, Sir Kostas Constantinou i tok Dokta Faamausili Lua'iufi i kamap wanpela nupela bod memba bilong BSP.

Dokta Lua'iufi i save stap long Samoa na em i gat Doktret Digri long Pilosopi, Masta ov Saiens (Menesmen Saiens), Basela digri ov Ats, Sosel na Politikel Saiens, na Diploma long Trening na

Menesmen.

Dokta Lua'iufi em i Stratejik Plening Edvaisa bilong Dipatmen ov Foren Afes na Tred (Australia) na em i save stap long Samoa.

Dokta Lua'iufi i gat planti yia ekspirens long stap long bod na em i wanpela kaunsil memba bilong Nesenel Yumnivesiti ov Samoa.

Em i stap memba bilong planti eksekutiv komiti bilong pablik sekta kaunsil na polisi komiti long Samoa.

Em i bin mekim sampela

ol konsalting wok long planti yia long Samoa, Solomon Ailans, Fiji, Niue, Tonga, Tuvalu na PNG.

Bank of PNG (Sentral Bank) i givim tok orait long makim em i kamap diarekta biong BSP.

Sir Kostas i tok welkam long Dokta Lua'iufi i joinim bod bilong BSP.

Em i tok ekspirens bilong Dokta Lua'iufi i ken helpim maket posisen bilong BSP long ol kantri insait long Pasifik we BSP i save operet.

## Oil Search kamapim hom onasip skim

BIKNEM oil na ges kampani Oil Search Limited i tokaut long nupela hom onasip skim long helpim ol wokman meri bilong PNG i baim o wokim haus.

Bod bilong Oil Search i givim tok orait long dispela skim long Oktoba 2016, na Intenel Revenu Komisn (IRC) i givim tok orait long Desemba 2016 long larim dispela skim i go het yet.

Aninit long dispela skim, kampani bai putim mani long helpim ol wokmanmeri i kisim dinau mani long kirapim nupela haus o baim haus.

Oil Search i luksave olsem dispela bai larim ol wokmanmeri bilong em i luksave long sampela hom onasip skim gavman i putim long developim nupela haus long Pot Mosbi na arapela senta bilong kantri.

Eksekutiv jeneral menesa bilong stekholda engesmen, Gereaa Aopi, i tok hom onasip na sekyuriti bilong famili we haus i ken givim long manmeri em i wanpela gutpela samting long strongim ol wokmanmeri.

"Tasol planti manmeri i no save gat inap mani long yusim olsem ekwiti long kisim dinau mani long benk na baim haus o baim graun na ol samting long wokim



Eksekutiv jeneral menesa bilong stekholda engesmen, Gereaa Aopi.

nupela haus," Mista Aopi i tok.

Em i tok dispela i save mekim hat long planti manmeri i baim nupela haus.

"Long dispela as, Oil Search nau i statim nupela hom onasip skim long helpim ol wokmanmeri bi-

long mipela husat i PNG sitisen long baim namba wan haus bilong ol o wokim nupela haus," Mista Aopi i tok.

Mista Aopi i tok dispela hom onasip skim i lukim bikpela invesmen bilong Oil Search long ol manmeri PNG, bilong kampani.

## BSP apim intres reit long ol seavings prodak

BIKPELA benk bilong PNG na Pasifik, Bank South Pacific (BSP), i apim intres reit bilong sampela ol seavings prodak bilong ol.

Jeneral Menesa bilong Riteil, Paul Thornton, i tok BSP i laik sapotim ol kastoma long kirapim tingting bilong sevim mani aninit long fainensal literesi program bilong em na ol i wok long sapotim dispela program wantaim gutpela intres reit long givim luksave long ol lain husat i sevim mani.

"Mipela i apim intres reit bilong Kids Akaun long 1.5 pesen long wan wan yia i go antap moa long 2.00 pesen.

"Pastaim intres reit bilong dispela prodak i bin stap namel long 0.2 pesen na 0.4 pesen long wan wan yia.

"Mipela i apim intres reit bilong Plus Saver akaun i go antap long 3.5 pesen long

wan wan yia.

"Mipela nau i baim intres long Sumatin akaun we mipela i baim 1.6 pesen intres long wan wan yia," Mista Thornton i tok.

Em i tok BSP i no save sasim mani long dispela tripela seavings prodak tasol intres reit i go antap na dispela i givim gutpela sans long kastoma bilong BSP i ken sevim moa mani.

"Intres reit bilong Kundu Standard akaun i go antap long 0.25 pesen long wan wan yia," em i tok.

Kundu Standard akaun em i ken kamap seavings akaun tu. Sapos kastoma i no rausim mani long dispela akaun long wanpela mun, benk bai no inap sasim mani.

Mista Thornton i tok intres reit bilong kisim dinau mani o we I no gat sekyuriti

# Fleming: BSP lukluk long givim dinau mani long wokman

Paul Zuvani i raitim

**MASKI i gat hevi bilong mani i stap, Benk ov Saut Pasifik (BSP) i mekim bisnis gut, Sif Eksekutiv Opisa bilong BSP Robin Fleming i tok.**

Em i tok long dispela as benk i wok long lukluk long givim dinau long ol wokman husat i gat tingting long mekim haus.

Em i tok stat long taim ol i mekim PNG LNG projek na bihain klostu long pinis bilong konstraksen ol i skelim olsem ol i mas mekim sampela samting long strongim benk.

Em i tok ol skelim olsem rot bilong ol long strongim benk long wok bilong em na lukim ol i gat ol arapela samting we ol inap long mekim mani.

Wanpela dispela ol samting em long skruim mak bilong givim dinau o lon long ol kampani na manmeri i go antap.

"Mipela i tok mipela i mas daunim mak bilong yusim mani i kamdaun na apim

mak bilong mekim mani i go antap," Fleming i tokim Bisnis Edventis.

"Long 2015 mipela i lukim namba bilong mani mipela i givim i go antap.

"Mak bilong mipela i givim lon i wining 40 i go long 45 pesen.

"Mipela i givim olsem K70 milien lon mani i go long ol kastoma.

"Dispela i min tu olsem mak bilong riteil benking bilong mipela i go antap tu.

"Tasol taim moa manmeri i opim akaun dispela i min tu olsem bai i gat sans long namba bilong ol manmeri husat i laik kisim lon i go antap.

"Dispela i no sot tem gro tasol i long tem gro, samting we mipela i bilip bai kamap long bihain taim olsem 10 i go long 15 yia.

Fleming i tok nau yet planti ol haus em ol i mekim long Mosbi tasol i bilip liklik taim dispela wok tu bai kamap long Lae, Morobe provins na bihain i kamap

long ol arapela senta.

Benk i save painim hat long givim bikpela lon long ol manmeri bikos ol manmeri yet i no gat bikpela mani o ol propeti olsem benk i ken skelim na putim mani bilong em i go antap long kamapim wok ol manmeri i laikim long em.

Em i tok long dispela taim benk i givim bikpela lon mani long gavman tasol.

Fleming i tok long sait bilong save sapos ikonomi bilong kantri bai kamap gut sampela taim olsem long wanpela yia taim, em i tok nogat.

"I luk olsem namel long 12 i go long 18 mun ikonomi bilong kantri bai go antap na kamdaun long em. No gat wanpela samting i stap long soim olsem ikonomi bai kamap gutpela hariap," em i tok.

Long salim sampela hap bisnis bilong benk, em i tok bikos long hevi bilong mani, ol i no inap long mekim olsem long narapela 12-pela mun yet.

# Barrick Niugini invesmen helpim papagraun

Paul Zuvani i raitim

**BARRICK Niugini Maining na Petroleum Industri Invesmen givim gutpela mani long ol len ona o papagraun husat kampani i tokim ol long lusim ples bilong ol na go stap long arapela hap bikos long wok i kamap.**

Chris Trainor, Komesel Services Menesa bilong kampani i tok ol i mekim olsem em i gutpela piksa long ol arapela maining kampani we ol inap long bihainim.

Em i tok ol i kamapim tras fan long lukim ol papagraun bilong Porgera gol main i ken kisim helpim long em long bihain taim wok bilong ol.

Kampani i save givim mani bilong ol papagraun long fan bihain long foapela mun tasol ol papagraun i no save baim takis long dispela samting.

Em i tok kampani i save inves long gavman bon.

"Dispela i save wok gut. Kain samting ol maining kampani inap long mekim," Trainor i tok.

Em i tok long lukim gut sindaun bilong ol papagraun ol i traim long mekim sam-

pela samting ol mekim haus tasol dispela i no kamap gut.

Eric Kramer, Sif Eksekutiv Opisa bilong PacWelt Kapitel husat i menesim dispela fan i tok, ol papagraun i save kisim olsem 10 pesen win mani bihain long tripela mun.

"Dispela i save kamapim gutpela mani na mani i save stap inap long taim ol i gat wok long em. Mi ting dispela i gutpela samting. Bihain long foapela mun ol i save kisim olsem 2.5 pesen," em i tok.

"Bikpela tingting em olsem ol i ken yusim dispela mani long taim ol i nidim, olsem long skul, ol i sik o long taim ol i laik mekim haus."

Kramer i tok dispela fan we ol i lonsim long tupela yia i go pinis i gat olsem K17 milien long aset na i gat 150 memba.

"Ol memba em ol i askim sapos ol i laik kisim helpim long fan bihain long 10-pela yia o 20 na olgeta i tok long bihain long 10-pela yia."

Em i tok wok bilong mekim ol papagraun i save long kaikai bilong dispela fan i bin hat na olsem ol i kisim moa taim long mekim ol papagraun i save long

helpim ol bai kisim long fan long bihain taim.

"Dispela i bin longpela rot, moa long ol lain bilong Barrick, long skulim ol papagraun long rot long helpim kain fan i save givim.

Em i tok kampani i bin givim mani long ol papagraun na dispela em i lukim olsem em i no bin kisim planti taim bipo long dispela mani i pinis.

Bihain long dispela kampani i mekim haus bilong ol, dispela tu i no bin stap longpela taim we i lukim ol papagraun bilong ol i save salim ken ol haus, kisim mani na yusim hariap gen.

Ol i save brukim daun haus na salim wan wan hap long mekim mani.

Bihain long dispela kampani i skelim olsem i gutpela ol i mas kamapim wanpela fan we ol i ken lukautim mani bilong ol papagraun na givim long taim stret we ol papagraun i laikim long en.

"Kain tingting sampela lain bai ting em liklik samting long wanpela man i gat moa long K100,000 long han bilong em tasol em i hat," Kramer i tok.

# TPA givim K10, 000 long kirapim turis bisnis long Hela

Aja Potabe i raitim

**TURISIM Promosen Atoriti (TPA) i givim K100, 000 long Hela Provinsal Gavman i kirapim turis bisnis long provins.**

Hela em i wanpela ples insait long PNG we kalsa na bilas bilong em i save pulim moa turis long kam raun long PNG.

Tasol planti pait i kamap long Hela na ol turis i prèt long kam raun.

Dispela i no stopim Hela Gavana Francis Potape long mekim wok long kirapim gen turis bisnis long provins.

Long las wik Fonde, Sif Eksekutiv Opisa (CEO) bilong TPA, Jerry Angus, na Minista bilong Kalsa, Ats na Turisim, Tobias Kulang, Gavana Potape na Hela Provinsal Edministreta William Bando i bin wanbel long wokbung wantaim long kirapim gen turis bisnis long Hela.

Minista Kulang i givim K100, 000 sek long Gavana Potape. Dispela mani bai go long kirapim nupela Hela turisim bireu, kamapim masta plen bilong turis bisnis, na mekim maketing na bisnis plen.

Mista Potape i tok tenkyu long TPA i luksave long



Gavana bilong Hela, Francis Potape.

bikpela sans Hela i gat long kirapim turis bisnis.

"Provinsal Gavman i bin skelim K2 milien long kirapim turis bisnis na mi wanbel long dispela sapot TPA i givim," Mista Potape i tok.

Mista Potape i tok Hela i gat oil na ges tasol dispela risos bai pinis wanpela taim.

"Turis bisnis em bai stap longpela taim yet long Hela na mi wanbel long yumi kamapim dispela patnasip long kirapim moa turis bisnis," Mista Potape i tok.

Em i tok Hela i nidim sapot bilong gavman long givim moa polis fos long daunim hevi bilong lo na oda, kirapim nupela haus kalabus long Hawa na kirapim ol nupela rot na bris long larim ples i stap gut long pulim moa turis i kam insait.

Mista Bando, husat i pas-taim senia opisa bilong TPA, i tok namba bilong turis long taim bipo i save planti tru tasol pait long provins i mekim na planti turis i stopim raun bilong ol long Hela.

"Kalsa na bilas bilong Hela i save pulim planti turis i kam insait tasol pait i bagarapim turisim industri long Hela.

"Mipela i laik kirapim gen dispela na mi wanbel long gavman i givim dispela sapot na luksave long turis bisnis," Mista Bando i tok.

Mista Kulang i tok em i gat strongpela bilip long Hela i ken pulim moa turis i kam insait long kantri.

"Kala na stail bilong bilas Hela i ken pulim moa turis i kam insait long kantri bilong yumi," Mista Kulang i tok.

# Laikim bilong ges no inap apim prais, saveman tok

Paul Zuvani i raitim

**LAIKIM bilong ges long wol i no inap apim prais bilong ges, Profesa Peter McCabe, het tisa bilong Australia Skul bilong Petroleum long Yuni-versiti bilong Adelaide i tok.**



Profesa Peter McCabe bilong Adelaide Yuni-versiti, Australia. Foto: Internet

Em i tok dispela em bikos kos bilong painim na kisim ges i no dia na ol kantri bai painim ol arapela rot tu bilong kamapim eneji arere long ges.

Long dispela as PNG i mas tingting gut long lukim olsem em i salim gutpela kwaliti ges long gutpela prais.

McCabe i mekim dispela tok long Papua Niugini Maining na Petroleum kibung long Sidni, Australia long las Disemba.

Em i tok mak bilong ol manmeri i yusim ges long Amerika na Yurop long las 40 yia i stap daunbilo.

Na long skelim hamas ges PNG i gat em i tok mak bilong ges i liklik taim wanpela i skelim wantaim ges bilong ol arapela kantri na long mak ol i salim long wol maket.

Long buk BP Statistical Review of World Energy 2016, PNG i gat olsem 0.1 pesen long risev bilong em, Not Amerika i gat 6.8 pesen, Yurop na Yuroesia i gat 40.4 pesen, Afrika i gat 7.5 pesen na Australia i gat 1.9 pesen.

Long hamas wanpela kantri i gat, Iran i gat bikpela we i stap long 18.2 pesen na Rasia i gat 17.3 pesen na Kata i gat 13.1 pesen.

McCabe i tok presa bai kam long PNG long lukim olsem kain ges em i kamapim i gutpela kwaliti na olsem em i inap salim long gutpela prais.

Em i tok em i tru bikpela

laik bilong ges bai kamap tasol bikos ol kampani i no save yusim planti mani long painim na kisim ges dispela bai lukim prais bilong ges i stap daunbilo na olsem PNG i mas was long dispela.

Em i tok long develop kantri laikim bilong papa bilong ol kar long yusim petrol o ges i wok long do daun bikos planti nau i laik yusim pawa kar we ol sasim batri na batri i kamapim pawa long wok.

"Ol kar nau i isi long ranim moa long we ol bai mas wet long kisim petrol o ges. Bikos planti lain i yusim pawa (ilektrik) kar, prais bilong petrol na ges bai stap daunbilo," McCabe i tok.

Tasol em i tok long ol developing kantri olsem Saina laikim bilong petrol na ges bai go antap.

Em i tok Oganaisesen bilong Ikonmik Kopesen na Developmen wok painim i soim laikim bilong kol na nuklia pawa tu i go antap.

Dispela em i tok PNG i mas wok hat long painim moa ol ges risev na ol arapela rot bilong kamapim eneji long mekim mani.

# PNGWiADF tenkim ol patna long 10 yia sevis

Barbara Tomi i raitim

**PAPUA Niugini Niugini Wimen in Egrikalsa Dvelopmen Faundesen (PNGWiADF) i selebretim 10 yia sevis olsem maus bilong ol meri fama long kantri long Januəri 25 dispela yia.**

Long tingim dispela de PNGWiADF Presiden Maria Linibi i tok tenkyu long ol patnasip we ogenaisesen bilong ol i bin gat wantaim ol bisnis komyuniti, stet institusen na ol stekholda olsem Nesenel Egrikalsa Risets Institut (NARI), Trukai, Zenag, Pacific Ailan Fama Ogenaisesen Netwok (PIFON), Australia Wimen in Egrikalsa (AWIA), Dipatmen ov Egrikalsa na Laipstok (DAL) na ol rejista memba bilong en long kantri.

Wantaim Misis Linibi long kamap long dispela selebren em pastaim eksekutiv bilong AWIA, Cathy McGowan na Val Lang. McGowan nau em i Memba bilong Palamen long Australia.

McGowan i makim toktok bilong Misis Linibi long tok tenkyu long ol sponsa bilong

ol husat i mekim na ol wok i kamap long ol PNGWiADF na i givim luksave long wanem kos na visen ogenaisesen i kisim bilong go moa long narapela 10-pela yia bihain.

McGowan na lain bilong em i kamap pren bilong PNG meri fama stat long Januəri 2017 taim 5-pela meri wantaim McGowan i kam long Lae na toktok wantaim Linibi wantaim sampela meri long kirapim PNGWiADF na ogenaisesen straksa bilong en na bihain long sampela yia bai givim ol lidasip trening long Lae, Rabaul na Pot Mosbi wantaim wanpela sponsasip bilong AUSAID.

McGowan i tok, olsem Memba bilong Palamen em i wok long tokim ol wanwok bilong em long wanem kain naispela kantri PNG i gat na ol naispela kaikai we em i gat na ol i mas kam lng hia long ol holide bilong ol na tu ol i mas baim ol kaikai bilong PNG na kisim i go long Australia.

Em i laik mekim dispela wantaim wanpela presentesen i go long wanpela grup insait long Australia Palamen we ol i kolim ol Pala-



**PNG Wimen in Egrikalsa makim 10-pela yia bilong egrikalsa sevis olsem maus bilong ol meri fama long kantri wantaim longpela taim ol patna Australia Wimen in Egrikalsa na NARI. PNGWiADF bai go pas long helpim ol meri fama long kamapim ol kaikai na long mekim mani bilong famili na stretim sindaun bilong ol. Pastaim AWIA Presiden Cathy McGowan (namba tri long han kais).**

men pren bilong PNG.

McGowan i gat plen tu long askim Seneta Fiona Nash husat i Deputi Lida bilong Leba Pati we nau i holim gavman na wanpela bikpela sapota, long em yet i mas kam long PNG long bungim ol PNGWiADF memba na ol sponsa.

Trukai i stap yet olsem bikpela sapota bilong PNGWiADF, taim em i sainim wanpela 5-yia Memorandum ov Andastending (MOU).

Menesing Dairekta, Greg Worthington-Eyre i tok olsem wantaim rais program bilong kampani long kantri, ol i bin lukim ol meri i stap

olsem ol draiva bilong wok ikononi bilong ol ples wok bilong ol long helpim ol famili na komyuniti bilong ol.

Em i tok Trukai bai stap yet long helpim dispela ogenaisesen inap planti moa yia bihain, olsem sponsa na tu olsem wanpela patna olgeta taim.

“Narapela 10-pela yia bai bikpela taim bilong senis na Trukai bai stap yet long sapotim dvelopmen na wok i kamap long narapela 10-pela yia plen,” Worthington-Eyre i tok.

NARI husat i stap papa bilong PNGWiADF long fes 10-pela yia, i tok promis long sapotim yet ogenaisesen we nau i stap long rot bung.

PNGWiADF em i wanpela gutpela samting we i kamap long NARI olsem risets we ol meri i kisim long kamapim ol kaikai na mani bilong ol famili na sindaun bilong ol.

NARI Dairekta Jeneral Dokta Sergie Bang i tok PNGWiADF em i stap long gutpela posisen long kamapim samting na kisim gutpela samting i kam long PNG gavman invesmen long ol impek projek bilong egrikalsa.

Em i tok promis olsem em bai lukim PNGWiADF i mas putim sampela samting i go insait long Midium Tem Nesenel Egrikalsa Dvelopmen Plen na moa long ol dvelopmen bilong impek projek bilong egrikalsa.

## NCD Gavana opim wokabaut bilong Laip na yoga

Josiah Ururu Kana i raitim

GAVANA bilong Nesenel Kepital Distrik (NCD) i tokaut long wanpela pres konprens long siti hol asde olsem em i opim nau 2017 Wokabaut bilong Laip kempen.

Gavana Powes Parkop i bin holim dispela konprens wantaim saveman bilong Yoga, Jackson Kiap we tupela i toktok long gutpela bilong dispela kempen na ol senis we i kamap pinis wantaim dispela kempen.

NCD Gavan Pakop i tok olsem em i gutpela long olgeta pipel i mas go insait long dispela wokabaut long Laip na yoga kempen. Em i tok ol bai opim dispela kempen long Murray Barracks.

“Stat bilong kempen i senis nau. Em bai no moa stap long Jack Pidik Pak tasol em bai stap long Murray Barracks bikos long tingting olsem ol soldia i mekim wokabaut i seif long pablik inap long go insait,” Mista Parkop i tok.

Wokabaut bilong Laip bai stat long Sande 12 Februari na ples bilong stat em long Murray Barracks. “Mipela i senisim ples bilong statim i go long Murray Barracks bikos wantaim was bilong ol soldia ol famili i ken pilim seif na amamas long wok-



**Gavana bilong NCD, Powes Parkop i sindaun wantaim Kodineta bilong Wokabaut bilong Laip na Yoga, Jackson Kiap long pres konprens asde long NCDC Siti hol. Poto: Nicky Bernard.**

about,” Mista Parkop i tok.

“Bikpela tingting em long wokabaut bilong Laip na yoga kempen long mekim olgeta manmeri i kamap risponsibel na bosim Laip bilong ol yet long helt na sefti,” Gavana i tok.

“Long dispela we planti lain i kam insait pinis long Wokabaut bilong Laip na Yoga kempen na ol i sat long go bek long ol komyuniti bilong ol na wokim ol klinap. Ol lain i kam olsem long Morata, Kondedobu, Koki, 9-Mail, na 8-Mail na ol i tok helt bilong ol i stap long klinapela na seif envairomen.

Kodineta bilong Wok-

about bilong Laip na Yoga kempen, Jackson Kiap i toktok tu long konprens.

“Mipela i wokim pinis tupela wik awenes kempen na 22 komyuniti i kam insait pinis long wokabaut wantaim mipela,” Mista Kiap i tok.

“Bikos Wokabaut bilong Laip bai stat long Sande moning long 5 klok moning taim olsem na ol bas bai stap sambai long 3.30 moning taim,” Mista Kiap i tok.

Mista Kiap i tok klia long tingting bihain long kempen olsem em i no bilong strongim politik bilong Gavana Parkop tasol em i wanpela indipenden kempen

bilong strongim pasin bilong stap helti.

Bikpela toktok bilong Wokabaut bilong Laip 2017, “No ken givim sans long Jenda Bes Vailens” olsem hap bilong las yia bikpela toktok bilong wokabaut bilong Laip em “sanap wantaim kempen” we em i sut long pinisim Jenda Bes Vailens long kantri na mekim ol siti i kamap seif ples bilong ol meri na ol gel.

Stat long 2014 Wokabaut bilong Laip i makim planti ol kempen pinis wantaim wok bung bilong ol kain ejensi olsem Eda Ranu, Helt Dipatmen, ol NGO na ol UN ejensi.

## Goroka Coffee em nambawan

Nicky Bernard i raitim

PLANTI lain long Goroka na ol ples i save kamapim kofi bai tokim yu olsem, Yu Lukautim kofi na kofi bai Lukautim Yu. Dispela liklik toktok bilong ol i no giman, em trupela toktok.

Kofi bilong Papua Niugini em namba wan long Wol taim ol retim o makim. Em i gat gutpela tes na i strong tru we planti lain long ovasis save laikim.

Tasol liklik hevi bilong em ol papa bilong Kofi gaden, ol yet i no save lukautim gaden kofi bilong ol we i ken karim klostu klostu, dispela hevi e mol wok manmeri bilong Coffee Industri i wok long mekim awenes long ol papa bilong kofi gaden.

Planti ol wait man i bin

kam long PNG na traim kofi bilong yumi na ol makim olsem PNG Kofi em namba wan long wol.

I gat planti kofi bilong PNG na planti teis bilong em olsem Coffee Industri long Goroka i mekim planti kofi bihainim tes na veliu bilong ol.

Lukim piksa bilong kainkain Kofi i kam long Goroka Coffee Industri long Isten Hailens Provins. Planti Provins insait long Papua Niugini nau i groim kofi.

Bikpela toktok bilong ol Coffee Industri em. Kofi bai i no inap pinis long Papua Niugini, ol narapela risos olsem Oil, Gas, Kopa, Gol na ol narapela bai pinis na kofi bai wanpela jeneresen i go long narapela jeneresen bai kisim mani yet long en.



**Ol kainkain Kofi i kam long Goroka Coffee Industri. Poto: Nicky Bernard**

# Indigenous tim bai danis long traime resis



Ol Indigenous pilaia i bung tupela de bipo long 2017 Harvey Norman All Star resis.

TOP pilaia bilong ol Kana-groo, Greg Inglis, i bilip olsem planti bilong ol Testim poro pilaia i sapot long ol Indigenous All Star bai danis long Fraide nait long McDonald- Jones stediam bilong ol Newcastle.

Inglis bai go pas long danis bipo long ol i statim via resis egensim ol World All Star bipo long ol NRL Indigenous pilaia i bin bung long las wiken.

Ol pilaia bilong Indigenous

i gat inap strong na ol i save gut long danis long pablik bi-hain long ol i bin kamapim dispela danis na traime danis insait long 4-pela yia.

"I no gat wanpela asua bai kamap long taim bilong danis," Inglis i tok.

"Mi laik bringim dispela danis i kam bek bikos em i wanpela narapela kain samting long ragbi lig."

Ol bai toktok wantaim kosa bilong Australia, Mal

Meninga, bihain long em i bin kamapim dispela tingting na ol bai mekim olsem long Wol Kap long pinis bilong dispela sisen.

"Sapos ol i wanbel long save long dispela danis em bai kamap wanpela singsing bilong Australia olsem long haka bilong ol Nu Silan," Inglis i tok.

"Mal i sapotim dispela tingting na mi bilip olsem planti pilaia bai sapotim tu."

# Ol Patriots i winim Supa Bowl

DISPELA i namba 5 taim bilong ol Nu Ingran Patriots long kamap sempion long Supa Bowl resis.

Ol i bin kamapim histori long Supa Bowl resis na daunim ol Atlanta Falcons, 34-28, long NRG Stediam long Houston.

Supa Bowl em i bikpela resis tru bilong gridain o Amerika futbol.

Atlanta i stap pas wantaim 28-3 poin inap long namel taim bilnog namba tu hap bilong resis. Tasol ol Patriots i bin mekim gut long las minit na daunim ol Falcons.

Dispela i namba wan taim bilong ol Falcons i no mekim gut long las minit.

Dispela em i namba tu taim bilong ol Atlanta long



Tom Brady bilong ol Patriots i apim tropi bihain long ol i winim Supa Bowl taitel.

reisis long 51 sisen i bin kamap pinis. Namba wan sisen bilong ol em ol i bin pilai egensim ol Denver Broncos long 1998 we ol i bin lus long 34-19 poin.

# Christian Hammer i stopim David Price

CHRISTIAN Hammer bilong Jemani i bin stopim David Price long raun namba 7 bilong Eubank-Quinlan IBO supa-midweit taitel pait long London.

Price i bin paitim Hammer planti taim long namba wan hap bilong resis, tasol em i sotwin hariap taim Hammer i kisim strong na stap yet.

Long 1.20 seken bilong namba 7 raun, Hammer i

paitim em na referi i go stopim pait.

Dispela em i namba 4 taim Price i lus long piat na em bai no inap pait gen.

Strong bilong Price i pinis long namba 4 raun bikos em i bin yusim planti strong bilong em long ol namba wan na tu raun.

Hammer i kisim moa strong long namba 5 raun na em i bin pundaunim Price

wantaim wanpela strongpela apakat.

Hammer i bin pundaunim Price gen wantaim narapela apakat long namba 6 raun na pinisim olgeta strong bilong em long bodi bilong Price long namba 7 raun na rausim em long hap bilong pait.

Hammer i kisim Wol Boksen Ogenaisesen (WBO) Yuropien taitel bilong em long taim em i win.


# Croker bai kisim ples bilong Leilua long All Star gems

CANBERRA Nesenel Ragbi Lig skipa, Jarrod Croker, i bin joinim ol World All Star tim na kisim ples bilong poro pilaia, Joey Leilua, bihain long Leilua i kisim bagarap.

Croker bai pilai senta long Fraide nait resis i kamap egensim ol Indigenous All Star long Newcastle.

Ol Harvey Norman All Star i redim namba wan taim na hap bilong ol sapota long lukim resis namel long ol Indigenous All Star na World All Star.

Ol Indigenous All Star bai makim ol asples lain we ol i gat bikpela amamas long kisim pilaia graun.



Kepten bilong ol Raiders, Jarrod Croker.

# Parker na Fury bai pait long Nu Silan



Joseph Parker i winim WBO taitel

WOL Boksen Ogenaisesen (WBO) i strongim na tokaut olsem Hughie Fury bai go long Nu Silan long salensim WOB heviweit sempion, Joseph Parker.

Parker bai pait long namba wan wol taitel resis long asples bihain long em i bin daunim

Andy Ruiz Jr long Desemba, 2016.

Dispela resis bai kamap long Epril 1, 2017 long Oklan, Nu Silan.

Fury i bin pait long ol narapela kantri bipo we em i bin win long Kanada, Amerika na Monaco insait long em i bin winim 20 pait.



Christian Hammer (namel) i winim WBO taitel.



# Fauna sevei kamap long KBK na Ramu riva eria

WANPELA fauna sevei o wok painimaut long ol wara bihainim bikpela Ramu riva na ol liklik han wara na ol baret klostu long Ramu nikel/kobalt main operesen i soim olsem no gat bikpela bagarap o pret i stap tude long ol enimal, pis na ol samting i stap nau long envairomen.

Dispela fauna sevei i save kamap tupela taim long wan wan yia. Ol opisa bilong Helt, Sefti na Envairomen Dipatmen bilong Ramu NiCo Menesmen i save karimaut dispela wok. Bikpela as tingting bilong dispela sevei em long sekim na glasim gut kwaliti na helt bilong ol pis na abus insait long wara na wara na eria klostu long wok maining operesen long Kurumbukari.

Ol envairomen saintis

husat i bin stap insait long dispela sevei, Steve Opur, Alex Kambual, Elizah Kamane na teknisen Dickon Yoga.

Long dispela sevei tu i bin lukim ol lokal lain long ples long Kurumbukari eria i bin go wantaim ol HSE envairomen saintis long lukim wok ol i wokim.

Dispela tupela wik sevei i bin stat long Janueri 16 na pinis long 24. Insait long dispela sevei ol envairomen saintis i bin putim umben na kisim ol enimal bilong wara olsem kindam na kuka na tu ol i putim umben na kisim ol pis na katim ol bodi bilong lukluk sapos i gat ol metal i stap insait long bodi bilong ol pis. Sevei i karamapim tu wok painimaut i go insait long kwaliti bilong wara we i luk-save long fisiokemistri na kemikol karektairaisin.

Ol sempol bilong wara na ol baio-tisiu spesimen ol lain i kisim long taim bilong dispela fauna sevei em ol bai salim i go long Australia National Laboratory Services long Australia long karimaut moa kemikol tes o analisis gen. Bihain long dispela wanpela fainal strim fauna ripot bai kamaut na bai go long Konsevesin na Envairomen Proteksen Atoriti (CEPA) long PNG.

Tasol bikpela samting na gutpela nius long dispela ol fil wok insait long sevei i soim olsem namba bilong ol pis insait long wara, han wara na ol baret i stap orait yet na no gat bikpela pret i bagarap i kamap long Ramu riva na ol han wara na baret wara arere long en. Na ekoloji bilong wara i stap orait yet.




Tupela HSE envairomen saintis i soim ol pis ol i kisim long umben long Banap tais.



Wanpela silva kap pis pas long umben long bikpela Ramu riva.



Tupela HSE Envairomen saintis i katim na kisim tisiu bilong ol fis.





# Futbal long PNG i nidim helpim long gro



Presiden bilong Lae Futbol Asosiesen, Roy Kamen.

**PRESIDEN** bilong Lea Futbol Asosiesen na Lae Siti Menesa, Roy Kamen, i bilip olsem futbol long PNG i nidim helpim long gro. Em i tok klia olsem PNG Futbol Asosiesen i kisim bikpela mani, tasol mama asosiesen i no givim sampela mani long ol liklik asosiesen.

KEPTEN bilong PNG Pukpuk, Henry Kalua, i givim biknem long tim bilong em long ol i bin soim kala bilong ol gut long 2016-2017 HSBC Wol Ragbi Sevens siris long Sydney, Australia long las wiken.

Ol i bin kam bek long kantri long Mande na Kalua i tok olsem ol Pukpuk i stap insait long pul wantaim ol strongpela tim olsem Skotland, Nu Silan na Australia, tasol tim i bin pilai gut tru.

"Tim i painim hat taim tasol ol i pilai gut," Kalua i tok.

Long pul resis bilong ol Pukpuk em ol i bin lus egen-sim Skotland, 26-12, Nu Silan, 31-7, na ol i lus tu egen-sim ol Australia, 26-7.

# Ol Pukpuk i bin pilai gut



Kepten bilong ol PNG Pukpuk, Henry Kalua.

Ol i bin Lus gen egen-sim ol Frans, 17-0, na ol Kanada, 26-12. Dispela i lukim olsem ol i no winim wanpela ples long pilai long namba 13

fainal resis.

Ol i bin lus long Wellington na Sydney, tasol ol Pukpuk nau i lukluk long resis bai kamap long Hong

Kong bihain long dispela yia we ol i lukluk long kwalifai long HSBC Wol Ragbi Sevens siris bai kamap long 2017-2018.

# Ol i makim Lagona long Sydney Dream Tim



Joanne Lagona bilong PNG Palais, husat i joinim Sydney Dream Tim.

NAMBA wan pilaia bilong ol PNG Palais, Joanne Lagona, husat i save putim planti trai bilong ol Palais em ol i bin kisim em long Sydney Dream Tim.

Dispela tim em long 2016-2017 HSBC Wol Ragbi Lig Sevens Siris resis bilong ol meri long Sydney, Australia we Lagona i save driman long joinim.

Ol Palais i bin kamap las long Sydney tonamen long las wiken, tasol Lagona em i narapela kain pilai husat i save soim kala bilong em gut tru. Em i bin putim 9-pela trai wantaim tupela konvesen kik na i kisim 49 poin long 5-pela resis ol i bin pilai long las wiken.

Lagona i pinisim top poin long skoaim trai long dispela tonamen.

- Ol skwat bilong Sydney Dream Tim em;
- Charlotte Caslick bilong Australia,
- Leyla Alev Kelter bilong USA,
- Joanne Lagona bilong PNG,
- Ghislaine Landry bilong Kanada,
- Jennifer Kish bilong Kanada,
- Brittany Benn bilong Kanada na
- Naya Tapper bilong USA.

## Philemon Tame i raitim

PAPUA Niugini Ragbi Futbal Lig (PNGRFL) i tok orait long 44 lig i ken stap wantaim long Anual Jenerel Miting (AGM) bai kamap long Februari 25, long Lae, Morobe Provins.

CEO bilong PNGRFL, Reatau Rau, i tok olsem insait long dispela 44 lig em 13 lig bilong Sauten rijon, 4-pela lig bilong Niugini Ailan rijon, 16 lig bilong Hailans rijon 11 long Noten Konfederet husat i winim olgeta afiliesen mak bilong 2016 na bihain ol lo bilong PNGRFL.

"Ol 44 lig i winim olgeta mak long stap long AGM na ol presiden bilong ol i kwalifai long stap long AGM bai kamap long Sarere, Februari 25, 2017 long Lae Intenesenel Hotel long Morobe Provins," Rau i tok.

Em i tok olsem Siaman bai givim fainensel ripot na tu ol bai ranim ileksen bilong Siaman na bilong ol 4-pela Konfederet Dairekta.

"Mipela i bin salim ol nominesen fom i go long ol wan wan Konfederet Dairekta bilong givim long ol



CEO bilong PNGRFL, Reatau Rau.

afiliet lig bilong ol. Ol i makim ol nominesen fom na ol bai i no inap long mekim ol kopi bilong ol nominesen fom," Rau i tok.

Em i tok klia olsem wan wan afiliet lig bai makim wanpela kendidet bilong ol na wanpela bai strongim dispela man o meri bipo long man husat i makim long namba wan hap bai sainim na ol bai givim bek long CEO.

"Ol dispela nominesen fom bilong ples bilong Siaman bilong PNGRFL na Dairekta bilong Konfederet i

mas kam long opis bilong mi bipo long 5 klok apinun long dispela Fraide, Febuerei 10, 2017, bikos mipela i mas bihainim lo bilong PNGRFL," Rau i tok.

Ol afiliet lig long Sauten em; Pot Mosbi (PRL), Mosbi Saut, Motu Koita, Papa, Koiari, Tauruba, Kemabolo, Popondeta, Kiunga, Wippie (Westen), Kerema, Tei Kariko (Galp) na Gaire.

Long Niugini Ailan em; Is Nu Briten, Buka, Rabaul na Kimbe.

Long Hailans em; Goroka,

Kundiawa, Kerowil, Banz, Kimil, Minj, Mt Hagen, Imbonggu, Tari, Mt Hagen Not, Magarima, Mendi Ialibu, Opka, Pangia na Wabag.

Ol afiliet lig long Noten em; Madang, Wau/Bulolo, Atzera, Usurufa, Lae, Ramu, Wewak, Madang Unity, Kainantu Gateway, Vanimo na Kesevaka.

Em i tok moa olsem olgeta presiden bilong ol lig bai go long Lae long apinun bilong Fraide, Februari 24 na bai go bek long Sande moning, Februari 26.

# Buluminski wilwil resis bai kamap long Ista wiken

INTENESENEL na lokal man husat i save resis long wilwil bai resis long tripela de wilwil resis bai kamap long Ista wiken long Buluminski Haiwe long Nu Ailan.

Lahir Triathlon klap i go pas long dispela resis we ol bai resis long winim 69 kilomita long de wan, 96 kilomita long de tu na 98 kilomita long de tri.

Buluminski Haiwe i gat kolta i go inap long 41 kilomita na mak long 28 kilo-

mita bihain long 41 kilomita i bagarap liklik.

De wan resis bai kamap long Fonde, April 13 em ol bai resis long gutpela na nogut rot wantaim.

De tu resis bai kamap long Fraide, April 14 em ol bai resis long 96 kilomita long gutpela rot.

Fainal de resis bai kamap long Sarere, April 15 em ol bai resis long winim 98 kilomita long gutpela rot.

Ol bai gat wanpela moa resis long Mande, April 17, na tu ol bai resis long solwara swim mak long 1 na 2 kilomita.

Dispela resis i bilong promotim awnes long vailens egen-sim ol meri program ol i kolim "Trupla man trupla meri".

Ol i bin makim 30 lain bilong resis pinis. Foapela bilong ol dispela lain i bilong Nu Kres long Lahir, 5-pela bilong Cairns, Kwinslan, na 21 bilong

Nu Ailan Saikeling Klap.

Ol lain husat i go pas long dispela resis i strongim olsem sampela ol junia lain i save long resis long wilwil bilong Nu Ailan Traithlon Ekademi em ol bai resis tu long las de wantaim ol Kavieng polis long ol nupela motobaik bilong ol.

Ol ogenaia i laikim ol lain bai resis long painim kaikai, haus bilong slip, sefti na trenspot bilong ol yet.

# CCIC fainal bai kamap long Sarere



Ol nokaut resis bilong Ipatas Kap i bin kamap long Kone Tigers pilai graun long las wiken.

## Philemon Tame i raitim

**FAINAL bilong Sauten Coca-Cola Ipatas Kap resis bai kamap long Sarere we bihain ol bai tokaut long hap bilong resis.**

Wanpela kodineta bilong Sauten Lek, David Silovo, i tok olsem ol i bin skruim fainal i kam long dispela Sarere bikos i gat sampela asua i kamap na ol fainal bai no moa

kamap long Kone Tigers pilai graun long dispela wiken.

Long preliminari fainal bilong ol man, Marane Stoneville bai pilai egensim ol QPR Wanderers. Wina bai go het na bungim ol Paga Panthers long namba wan gren fainal.

Ol City Redbacks bai bungim ol NBC Watchdogs long namba tu preliminari fainal. Wina bai bungim ol

Mix Dogs.

“Hap bilong fainal em ol bai tokaut long dispela wik,” Salivo i tok.

Long tupela gren fainal, wanpela tim bilong NCD na wanpela tim long Sentral bai winim tupela golden pas long go insait long narapela stei bilong Ipatas kap.

Ol X-Factors na X-Rox bai resis long gren fainal bilong ol meri.

# PNG Anda 17 i go kamap long Tahiti bilong OFC Sempionsip

PAPUA Niugini Anda 17 soka tim bilong ol man i bin go kamap long Tahiti long Mande, bilong resis long Osenia Futbol Konfederet (OFC) sempionsip bai kamap long Februari 11 i go inap long Februari 24.

PNG i stap long Pul A egensim

asples tim Tahiti, Vanuatu, na Nu Kaledonia.

Namba wan resis bilong ol bai kamap egensim ol Nu Kaledonia long opim resis long Februari 11.

Het kosa bilong ol, Harrison Kamake, i laikim tim long go insait long

kem long Tahiti na lukluk long resis.

Ol i bin go long OFC sempionsip bihain long ol i bin pinisim ol poro resis bilong ol gut long Nu Silan.

Ol i bin pilai tripela poroman resis long taim ol i bin stap long Nu Silan egensim Fiji Anda 17 nesanel

tim, Oklan Sentrel Ekademi na Onehunga Mangere namba tu divisen tim.

Ol i bin daunim ol Onehunga namba tu divisen tim, 2-0, long Sarere.

Kamake i amamas long ol i bin win

na i tok olsem tim i stap long gutpela fom long resis na i lukluk long salensim ol resis bai kamap bihain.

“Tripela poroman resis long Nu Silan i kirapim tingting bilong mipela na nau mipela i lukluk long ol resis bai kamap bihain,” Kamake i tok.



Ol skwat bilong PNG Anda 17 soka tim.



Poroman resis i bin kamap namel long ol Onehunga Mangere namba tu divisen tim long Nu Silan.

# PNG Palais i stat redi long Hong Kong 7s



Ol skwat bilong PNG Palais.

PAPUA Niugini Palais i kam bek long Sydney sevens tonamen na bai statim wok redi klostu taim long go long Hong Kong sevens tonamen.

Tim bai resis long Hong Kong sevens tonamen long Epril 7 i go inap long Epril 9 na dispela em i kwalifaia resis long go insait long Wol Siris.

Ol palai i no bin win long Sydney sevens tasol ol i bin pilai gut.

Ol i bin lus egensim Nu Silan long namba wan resis, 34-5, Kanada i daunim ol, 39-3, long namba tu resis na Frans i daunim ol, 31-10,

long namba tri resis.

Long de namba tu resis em ol i bin lus egensim ol Ingran, 29-17, long tropi salens kwata fainal. Spain i bin daunim ol, 31-17, long fainal bilong kisim 11 ples.

Kosa bilong ol, John Larry, i tok olsem ol i lukluk long Hong Kong sevens tonamen. Tim bai makim 12 i go inap long 20 pilaiataim ol bai go insait long trening long go long Hong Kong.

Tim gat gat planti ol yangpela pilaia wantaim ol pilaia husat i save gut long pilaia olsem Kymilie Rapilla,

Joanne Lagona, na kepten bilong ol, Lynette Kwarula.

Rapilla i tok bipo long Sydney sevens tonamen olsem ol i bin mekim gut long taim bilong trening.

“Yumi mas saptim yumi yet, skelim ol save bilong mipela long pilai graun na trening na lukluk long ol samting mipela i bin lainim long ol tonamen i kamap pinis.

“Wantaim Lynette na Joanne olsem senia pilaia long tim, mipela i traिम long helpim ol yangpela pilaia,” Rapilla i tok.

# PNG bai go pas long RLWC2017

...Marum i gat bikpela amamas

KOSA bilong Papua Niugini Kumul, Michael Marum, i tok olsem em i bikpela samting long kantri bai go pas long Ragbi Lig Wol Kap 2017 (RLWC2017) resis.

Dispela i bikpela samting long bringim Wol Kap resis i kam long PNG.

Marum i tok olsem, inap long taim em i bin pilai bilong PNG, kantri i save go pilai long ol narapela kantri. Nau long bringim RLWC resis long PNG em i bikpela samting long ol sapota na tim.

Tonamen bai kamap long Oktoba 26 i go inap long Desember 2 na Australia na Nu Silan bai go pas long ol nara-



Kosa bilong PNG Kumuls, Michael Marum.

pela gem tu.

PNG bai go pas long tripela pul resis bilong ol Kumul long Nesanel Futbol Stediam (NFS) egensim ol Wales long Oktoba 28, egensim ol Ailan long No-

vemba 5 na egensim ol USA long Novemba 12.

Marum i tok tenkyu long Ragbi Lig Intenesenel Federesen (RLIF) bilong givim bikpela sans long PNG long go pas tripela pul resis.

# PNG Karate i pinisim namba wan trening kem

PAPUA Niugini Karete-Do Federesen (PNGKF) skwat i pinisim namba wan trening kem bilong ol long dispela yia long Pot Mosbi.

Presiden bilong PNGKF, Carl Mari, i tok olsem ol i bin salim pas i go long ol memba bilong skwat long Sauten rijon tasol long go

long kem i bin pinis long mun i go, bikos i no gat inap mani bilong planti lain long go long kem.

Mari i tok, het kosa, Sensei Trevor Roberts, i go pas long dispela trening kem long mekim wok redi bilong kisim ol skwat i go long Dubai Karate 1 resis long

Mas, 2017.

Em i tok moa olsem narapela trening kem bilong PNGKF skwat bai kamap long Lae long Epril 17 i go inap long Epril 21.

Doris Karomo na Crystal Mari em namba wan Karate bek blet etlit husat i go insait long tes na i pas.

# RAUN 2 BILONG MENS SOFTBAL LONG MOSBI

Lukim ol eksen piksa bilong ol man softbal i kamap long Bisini long wiken



Beta bilong Gazelle i kaikai tit long paitim bal taim ketsa bilong Eagles i putim gut was long bai wantaim ampaia.



Rana bilong Brown Eagles i ran long namba wan bes tasol i popaia long Gazelle.



Beta bilong PNG Pawa B gret i redi long paitim bal.



Bik boi bilong ol Brothers i ran kam hom.



Rana bilong ol Brothers i lukluk long bes na tingitng long slip antap taim pilaia bilong Saints i lukluk.



Beta bilong Saints i lukluk long paitim bal.



Mista Tokome i redi long tromoi bal.



WHITE TUNA FLAKES  
**DIANA White**



Manufactured by:  
RD Tuna Cannery Ltd.

WHITE TUNA  
insait  
**K 2.20**



*Tasty and Flavourful White Tuna for Everyone!*

# OI PNG Lewas bai pilai egensim Pakistan



SITI Pharmacy PNG Lewas bai pilai egensim Pakistan long Fraide long namba tu resis bilong ol long Intenesenel Kriket Kaunsil (ICC) Wol Kap Kwalifaia resis bilong ol meri.

Ol Bangladesh i daunim ol Lewas wantaim 118 ran long resis we ol i bin opim ICC Wol Kap Kwalifaia resis bilong ol meri long Tunde long Colombo Klap pilai graun long Sri Lanka.

“Dispela em i bikpela samting bilong ol tim na wan wan pilaia long pilai gut sapos mipela i go long neks level bilong resis.

“Sapos, wan wan pilaia i no pilai gut, tim bai no inap long mekim gut,” kosa bilong

Lewas, Rodney Maha, i tok. Resis egensim Pakistan bai stat long 2 klok apinun (PNG taim) long Nondescripts Kriket Klap.

Ol tim i stap long Grup A bilong kwalifaia resis em India, Sri Lanka, Ireland, Zimbabwe na Thailand.

Ol tim i stap long Grup B em Saut Afrika, Pakistan, Bangladesh, Skotlan na Papua Niugini.

Long ol narapela risal bilong resis i bin kamap long Tunde em;

- Saut Afrika i bin daunim Pakistan wantaim 63 ran
- Ireland i daunim Zimbabwe wantaim 119 ran
- India i daunim Sri Lanka wantaim 114 ran

Oi skwat bilong PNG Lewas.

## Mitsubishi FUSO Rosa Bus



Apgred ensin  
130Hp  
4 silinda disel



**Ikamap Wantaim  
26 na 30 Sit**

Hariap nau na go long  
Boroko Motors dila bilong yu

Port Moresby ph: 325 5255 | Lae ph: 472 1144 | Mt Hagen ph: 542 1933 | Tabubil PH: 649 9048  
Kimbe PH: 983 5035 | Madang PH: 422 2659 | Kokopo PH: 982 8193 | Goroka PH: 532 3552

Email: info@borokomotors.com.pg  
Website: www.borokomotors.com.pg

